

T9117/4344(14)

小倉山房詩集

四

小倉山房詩集卷十二

丙子

錢唐袁枚子才



許滄亭觀察亡逾年矣家不戒于火遷柩南郊孟
亭太守招同人載酒爲安其靈

一盂麥飯出南門都是遽園舊酒人里析有災空引輶
夏侯無客不沾巾生前華屋花長閉城外清明鬼亦春
腸斷江頭王武子黃公墟下說音塵

過錫山訪嵇少宰不值

久別春風意惘然一朝船到戟門前蒼頭覓主無尋處
紅樹留人有晚烟想戴豐貂采靈藥可留餘夢入鈞天
輸公色養真清絕菽水名山第二泉

繡衣前歲駐山陽團扇題詩寄數行細雨吹燈春夢遠
嬌鶯啼月落花涼當時燕子棲華屋此日閒雲過草堂
愁見絳帷盧子幹季長絲髻已蒼浪

公子承謙從余授

引鳳曲

有序

庚午秋余避瘧蘇州或繩張校書女閨獨絕矚
之則擁髻疑立妙婧流靡自言小字阿鳳生十
九年迎歸秋齋隨郎轉側亡何鵠母來勸歸淚
泫泫下問欲留乎不答問他郎何以不如是亦
不答贈赤側袖中色然而拒恥作河間姹女既
別不知所往今年春余再過吳鄭叟者指天台
山有桃花不知劉阮故舊雨旣見各齒擊曰是

也喜且悲誦前詩畧皆上口少選屏人曰能爲
妾道地者君也肯畜鳳耶當以傅婢禮見肯好
此御神鳳耶當以女弟禮見人壽幾何君忍一再誤耶
余書楚人稱媚調之鳳無奈何乾笑再拜適故
人劉魯元趙文山官其地而秀才戴右麟有下
達之託訟言其故答寄緘逐之六月九日執燭
前馬婚于戴氏余讀會真記常怪微之悔過有
不終之恨然則如余之以不終終之者較於微
之當何如也作引鳳曲一章

姑蘇城外三春水年年生長如花女牛渚磯邊臨汝郎
泛水尋花狂不已乾隆庚午六月初長陵小市駕輕車

迎來絳樹花同笑比到珠團玉不如雙瞳剪水髣橫雲
千蝶羅衫百鳥裙才共旗亭題畫壁更隨深巷駐雕輪
自言家住橫塘口都知錄事聲名久彈箏慣唱小秦王
舞袖能翻大垂手但看釵頭玉鳳凰兒家名字君知否
二八芳年嫁狡童浮花浪蕊日西東蕉葉有心空捲雨
楊枝無力自隨風一朝曲被周郎顧碧鸞尾接銀河渡
願作銜泥燕上梁休教落月烏啼樹碧玉回身抱滿懷
可憐金玦易離開門前阿母香車至坐上啼痕滿面來
此時無力唱回波此際情深可奈何不學丁娘索翠翹
不封朱帛寄櫻桃只留一把相思淚當作珍珠兩處拋
明朝重過碧雞坊銀漢紅墻事渺茫青鳥使沉劉禹錫
碧天腸斷冷朝陽十年阿軟重相見桃花依舊如人面
雲雨襄王憶夢中王珉舊手存團扇說到滄桑我欲愁
蕭郎萬里走涼州往日館娃餘蔓草新添小婢學梳頭
殷勤苦把三生托惜花爭忍看花落振觸媧皇煉石心
難禁子夜連珠諾定情代看水晶盤嫁女無如戴叔鸞
下託長官劉子翼上求太守白香山昔日鴛鴦今鳩鳥
蓮花度出污泥早換羽移宮總是春將姝改妹知誰好
閨門萬口說因緣紅豆金筌播管絃劍墜龍淵雷拔地
未許滄海月當天惆悵當年范大夫西施網得贈東吳
今朝位置傾城畢明日扁舟泛五湖

爲王壽峯題問天圖傲玉川體

我聞秦宓言蒼天實有耳胡爲楚大夫問天天不理三
千年後王郎來拔劍斫地顛如雷口存三寸不爛舌仰
首只望天門開更有青雷子下筆巧安排畫作奇峰直
上離尺五儼然漢武皇帝通天臺手攀星辰呼帝座笑
殺赤章道士胡爲哉一部十七史欲問問何處且摘疑
端三兩行請風吹入雲中去一牛享天天豈飽麤鼠食
之不知惱潮退偏教虜馬來風起猶嫌殺人少試問謚
之如何箋歐公如何考夏后善逢迎三嬪獻自天雨暘
悉憑應上公霹靂怕逢薛孤延昂然操懿來配享文王
后稷退避不敢前又何必重黎爲隔絕黔羸爲周旋臣
請手斬九關豹身推阿香車白榆燒作玉樓墨銀河洗
盡筆底花三十六皇各獻狀羣疑滿腹願倩麻姑爬倘
有譎語問舛錯請將臣身賜喂金蝦蟆帝臺浮觴百神
方醉忽聞讜言躬躬如畏萍號噴雨立六竈含星對道
是問天天不答只恐萬年之後倚杵低蹇人上天都來
爭此位天帝面方一尺有慚色乃召孔子謀孔子口稱
不怨天恰呼喪子兩淚流且釣鯉魚逃亶州更召周公
來命代天致詞衆人又言周公天妹所生天有私故把
風雷驚破孺子疑不然剪爪沉河事已矣至今空自聽
鴟鴞周公聞之只得齟齬陰喝如蒙俱正在支吾間忽
有褒衣博冠者自稱唐臣柳宗元代天作對大書空道
天者乃是太虛之積氣難捫難舐青濛濛雨師風伯傀

備耳目強柴立隨癡龍奉行第一次混沌開闢所有之
故事有如優人演劇不能小變通一切聖狂禍福風災
鬼難各色目均是聚六州鐵鎔赤堊銅鑄成一冊作交
代使玉帝揺手不得而后許登庸並非三科五行有生
尅亦非天道幽遠如張弓並非仙丹佛力能挽轉亦非
真宰忽醉忽明聰惟其事原板板故其形常夢夢君不
見王莽請雷不能下魯陽揮日何曾東侵削龍伯不見
短吹嘘火井何曾紅又不見石補勞女媧頭觸怒共工
星隕驚梓慎月蝕愁盧仝自從開闢至堯舜雙丸業已
減至一分許何況四千年來減未終自家三百六十五
度難料理那管人間乾啼濕哭諸沙蟲可笑世界海妄
窺靜輪宮在剝麒麟皮郊鼓擊逢逢碧天若有情早已
老成翁太陽若下坐何以燭蒼穹譬如治家者尚且學
痴聾偶遺食餌魚鳥喜偶覆湯火螻蟻凶只緣人大物
小難檢校人實無心任過功何況天關鑰匙藏在烟霄
上清風一重雲一重赤縣神州九九八十一萬計中國
渺小如螻蟻提向瀛洲賣不值錢半通那能刻雕省記
勞化工汝何不解天弢飲天酒逍遙富媪游戲星童任
黃頰之變青曾聽剛須之生元蟲胡爲乎學楚狂呵壁
唇焦舌燥徒驚明月而惱春風王郎聞之心悶悶姑學
聖人存不論且待十二萬年之後全局終再與徹底通
盤作一問

過蘇州贈莊容可大中丞

朝聞說返巾車芳草萋萋梅熟初
舊雨正停青雀舫新恩剛賜紫泥書
談深半夜甄長伯學重明時陸敬輿
宸翰相期何以報為公一讀一歎歎

賜詩有速歸其善

活斯民之句

牙旗紅閃夕陽明許住南樓客亦清

壁上題句清到南樓客亦稀

梔

子花開春四面女兒香贈月三更心驚海甸哀鴻色腸繞閭門打麥聲笑索官倉一囊粟故人今已是蒼生隨園往歲駐征驂葉葉芙蓉露正酣同把科名憶年少各分吏隱占江南看山妬我三間屋出拜輸公九歲男廿載韶光風過眼雲龍角逐尚能堪

相逢花下一題襟買棹橫塘作越吟春酒玉堂天上夢清明遊子故鄉心人間努力留遺愛世外閒鷗聽好音莫忘棲霞山畔路碧雲紅葉共幽尋

約共遊攝山

還武林出城作

還鄉重出武林城天放湖光半日晴翠鳥衝烟飛雨後花枝當路勸山行采桑人少蠶猶小銜尾魚多水正清三十年前舊遊處荒橋野店總關情
屢問前溪路幾重故鄉翻與異鄉同行人肩出菜花上村女臂彎桑影中兩岸茶青三月暮一絲髮白萬懷空傷心怕說南唐寺他日僧歸塔可紅

過葵巷舊宅

久將桑梓當龍荒舊宅重過感倍長夢裏烟波垂釣處
兒時燈火讀書堂難忘弟妹同嬉戲欲問隣翁半死亡
三十三年多少事幾間茅屋自斜陽

將歸白下別莊大中丞

閒雲偶過玉闌干曾費華堂兩頓餐今日春歸儂亦別
新花攜上小船看

朱履平拖棨戟前江湖道術兩悠然不存半點雲泥迹
恐把初心愧昔賢

杜甫潭西久寂寥滄浪亭上兩回潮花開不唱高軒過
知有憂民病未消

連宵風雨滯春寒不特花殘客也殘賦別江淹留贈語
得君容易得民難

歸舟回泊錫山喜晤拙修少宰別後却寄四十韻

小隱袁臨汝遺榮賀季真相逢端午節一笑惠山春巢
燕難忘主馴猿尚號賓廿年燈火夢萬里別離身杜鄴

兒從學林宗雨折巾慙非千里馬曾遇九方歎適館懸
方榻移齋近紫宸書聲槐市聽經義禮堂陳地煖花能

發風高翼各振有緣通世好無分接清塵
枚出孫文定公門孫出稽

文敏公門賤子南征日先生珥筆辰飛觴澆末吏分俸潤行
人碧海翔孤鳳空江走弱鱗公才懷謝嘏舊手失王筠

沙坂霜蹄駿鹽車獨角麟憶雲泥有意犯斗路迷津再
踏天街雪重污相府茵鬢鬢臣面改奕奕獸頭新令嗣

衣辭褐司農手算緡李膺方接席丕豹又投秦讀禮車
仍返還山手更龜萱堂高甲子松影守庚申往歲黃河
決勞公赤舄巡新詩團扇贈舊雨點心頻渺渺瑤華信
飄飄弱水輪還朝歌瓠子贊化佐洪鈞爲奉潘安母歸
尋張翰蓴江天揮白羽腰帶解黃銀春水潮痕濶沙堤
草色勻兒時思釣弋膝下問羞珍觀樂應歛帽披貂更
采蘋鶯花歸哲匠風月識宗臣笑我爲殘客先公作逸
民四旬雙髻雪百歲兩家親飲水知官味尋春忘旅貧
可能稱幸草差免夔勞薪逝水傷陳迹知交感宿因奚
童情宛宛弟子禮恂恂半醉辭華屋深秋望釣輪何時
宋李雅千萬買芳鄰

謝趙黎村徵君治病卽以送別

當時同日賦長楊廿載賓鴻過草堂白下秋燈明舊雨
青山花影澹重陽元方齒長居兒輩中壘才多解秘方
剛是仲宣愁體弱苦教秤藥累真長

已將仙露挹靈苗便引晨風去碧霄活我只因緣有舊
離君轉恐病難消秋深古道詩逾健霜滿黃河浪不驕
倘拜東平憲王墓爲言故吏髭飄蕭

黎村故簡親王客

出塞圖

陰山風大雪花明匹馬沙場落日行漢代邊聲新畫角
秦時月色古長城春寒少婦三更怨酒熱陽關萬里情
笑我封侯無骨相不曾青海事功名

病

當階飄落葉我又卧高樓山裏先生病人間天地秋雨
涼蟬別樹風緊帳嫌鈎尚有關心問梅花補種不

瘧

宋玉悲秋時趙羅疔作候八月乃有凶

余兩次病以八月

三年

拜賜又幾疑彼瘧鬼匪寇乃婚媾初來頭岑岑須臾眼
黝黝投之深淵些層冰剝膚腠忽而醢鬼侯焚烟相灼
灸襄陽水正淹赤壁火復茂冰炭各爭強陰陽互掩覆
如潮不愆期似箭必滿殼疑賜牽機藥足前頭欲後豈
作木居士火穿復水透賊退氛尚惡渙汗如激溜牛勞
喘更喏黃鐘鳴滿脰淚滴瓊瑰珠夢逐南門味衣帶結

成繩篋髮須鋤耨強鉏足蹒跚考父背偃僂臨期測日
影擊柝如何寇望赦占災星月蝕如待救十輝窮眠履
六祝難詛咒我怒呼鬼來大聲與之响汝本黃帝孫暴
虐乃勝紂景丹古壯士爾已往相疾少陵昔詩人三載
爾不宥有意病君子吾將上帝奏逐汝伴刑天驅汝出
狗竇壺涿書鬼名空青摘鬼宿鬼乃跪陳詞公言殊賢
賢子來爲公迎子去爲公留園中風如刀公獨披襟受
池中月如霜公帆方曳繡快意禍機積放懷余毒厚匪
獨此之由求治亦太驟一年二豎來褚醫最賤謬柳似
大金丹襍進如米豆逐虎而閉門倒戈以自鬪陰血遂
狡債發癥儷宿瘤一年小作惡呂醫亦莖陋浮脉更升

挺心鬪聞血鯁非鬼亦非疾誰則任其咎公愛讀史書
奚不覽宇宙漢祖與唐宗大綱憑魚漏寧無水旱災元
氣仍交姤建元久視年科條漸輻輳桑孔法錙銖周來
禍結構添眉混沌醜舐糠雞犬瘦身世將毋同公胡勿
叅究古帝有人皇三萬八千壽其後神農來草根殺老
幼扁鵲剖齊嬰妻子避左右醫師屬冢宰十全更罕覩
瘡鬼雖併張病人不病歎况公無膏肓寒暑亦邂逅既
來莫天闕未來莫俯就勿吞棘刺尤勿恃春秋富新牡
謹遊房大夫祀中霤示吾杜德機吾去敢留逗願公如
伯夷念惡勿念舊毋學蜀市人天皇滿背鏤更願如石
處聞名鬼已走毋學高將軍功臣閣上伏予聞意恍然
如挹浮邱袖幽宗夜九拜朝霞日三嗽逐醫不逐鬼散
藥如散臭慎以代昌陽和以爲甲冑看花喚都兒伐木
課辛秀悠悠紅霞嚼坦坦青陽皺上壽何敢期中醫請
永安

五人墓

冤雲四垂風莽莽銀鑄鐵鎖閭門響閭門側目耳向天
天語不聞聞東廠東廠逮者周先生人不識面聞其名
九重天子詔安在阿儂此處難橫行李陽老拳一揮臂
萬手如星撒平地破柱難探逆豎頭披枝且奪元兇氣
萬人散盡五人存顏馬周楊市井民戴頭笑見高皇帝
干卿何事徒紛紛從此緹騎不敢狂九千歲事旋消亡

收回七首知何限抵得彈章更幾行君不見漢孫斌奮
拳格殺單超吏竟救興先徙朔方又不見唐五王上陽
宮裏相扶將不與同福同其殃當時高冠若箕數十輩
子姓跪起如奴忙豈無麒麟三丈護華表早已瀦沃蹲
牛羊何人肯奠酒與漿五墳纍纍春凄凄三月草長蝴蝶
飛可惜梁鴻生太早只知穿冢傍要離

卽事

三尺清溝手自開引他流水自西來明知東去留難住
且在儂家過一回

聽來鳥尚佳音少想見詩吟好句難戲把桃花吹落者
玉盤盛著當春看

自嘲

苦被詩書管常驚日影過卽貪三而刻墨慣兩頭磨學
老先扶杖辭官早畏靴賓朋名屢忘偏記古人多

歸舟作

姑蘇買舟白下行柳枝相送桃根迎三日勾留未出城
一夜春潮打船尾交頸鴛鴦宿被底行盡江南三百里
篙師呼酒我品茶休驚休喜休嘆嗟順風逆風總到家
寓目卽書
得失人休惱塞翁憑欄不覺笑東風蜘蛛自道張羅巧
網得飛花誤當蟲

韓昌黎孫袁中狀元而世人不知咏之寄慰魚門

落第

韓門曾有狀元郎底事無人說短長想見世間公道事
不將科第當文章

水軒主人招飲月下作

江城秋在酒人家酒對秋光興倍加風定竹呈千个字
霜高梅孕一身花紅鞭攜出天山雪席間出略紫菊排
成錦帳霞半夜風燈送行客滿壻醉影尚欹斜密鞭相示

答孟亭訊梅

寒梅初種後曾與故人期待放一林雪各吟千首詩忽
來連夜雨凍斷早春枝自是花渝約非關沽酒遲

小倉山房詩集卷十三

丁丑

錢唐袁枚子才

聞叔度少宰復命軍營寄懷一首

嘗羞隨陸不能武今見終軍能繫虜萬里馳歸草奏箋
白門夾道看裘五裘五貧賤交長安市上同遊遨
一朝致身青雲上華嶽峯高少依傍人驚儒者亦知兵
我怪西江還出將 聖朝神武滅高昌車鼻窮酋遠遁
藏馬謖已誅君奭死 朝廷未免憂邊防侍郎慷慨臣
請行十奏九合軍中情王修侍從解機變崔浩胸中盡
甲兵繡衣玉斧南薰殿 詔許千官設華餞親解金袍
賜狄公戎裝強換書生面一路龍沙持絳節交河馬踏

小倉山房 卷十三
層冰裂刁斗聲飛瀚海雲
刀光涼動天山雪
元帥靴邊問
主安三軍傾耳聽
籌策屈指婁闌首
可傳班超生
入玉門關拔將銅柱全
收地獻得金人好
祭天城南少婦寄征袍
堂上萱花露正高
誰知天外揮長劍
依舊歸心折
大刀男兒讀史長
嘆息貂蟬每借兜鍪力
健士奚須枉拍張詞臣
已見歌勅勒
天恩朝夕下
明堂
彗矢彤弓寵未央
聽說阜陽女兒隊
添唱從軍樂府章

謂采玉

傲劍南小體詩

春日山居事事宜
閉門行樂少人知
亭移舊料功成早
樹換新泥葉發遲
秃筆管仍裝麈尾
斷琴絃更拗花枝
年來悟得忘名意
除却風懷不咏詩

春影離離過畫廊
送春人與蝶俱忙
歌聲隔苑聽尤好
花氣隨風到始香
稚女鳴環爭白紵
旁妻蠲忿種青棠
消除長日知何事
只有傾心美索郎

朝烟暮雨倦登臨
倚危樓憶古今
螻蟻尚存封建法
圍棋時見井田心
山花受月紅成白
池水如人淺不深
中散春愁無著處
幽蘭開處去彈琴

題李後主百尺樓

黃花水小雨潺潺
南國樓臺夕照間
如此長江被量去
當年還唱念家山
檀槽金屑小琵琶
姊妹承恩似趙家
聽到流珠歌舊曲
一時腸斷六宮花

保儀不愧女相如手掌牙籤萬萬餘爭奈焚如學蕭繹
國亡遷怒到圖書

艸艸南朝一夢過潺潺春雨奈愁何官家賴有重瞳子
洗面終朝眼淚多

藥號牽機出禁宮此人又似不相容檀來歌罷江山穩
只合全家哭世宗

六道戈船出上游香孩兒太不風流關心卧榻鼾聲地
轉忘燕雲十六州

金字心經手自焚命燈竿斷九霄雲無情最是西天佛
送過蕭梁又送君

千年故國水雲涼樂府歌殘曲數行父老營齋妃薦福
何如文士弔斜陽

舟中作

有雨行偏速無江渡轉難行藏須自主莫認相風竿

喜晤同年程聘三少司馬

揚州斜日白門烟兩度班荆意黯然司馬宦情談酒後
故人顏色老江邊應劉同調升沉異元白無兒彼此憐
努力青宮勤啓沃斥蒿風味繼前賢

贈沈南蘋畫師

有序

吳興沈南蘋畫名藉甚雍正間日本國王持倭
牌聘往居其國三年授弟子若干老病辭歸國
王况施累萬同舟人受簿錄之累南蘋傾所有

以償至家竟不名一錢

東陽隱侯畫筆好聲名太大九州小片紙能開異國春
鶴書遠賁東夷島東夷之國日本強晉唐書畫多收藏
倭人字乞蕭夫子行賈詩歌白侍郎將軍重幣聘高賢
高士乘舟去若仙眼驚紅日初生處畫到中華以外天
天風吹下三千里行盡魚頭見魚尾斫取扶桑作管城
揮毫更進羊皮紙紫貝千雙國主恩鮫珠十斛門生禮
蠅點屏風墨未乾方諸拾淚寫牛欄奇花增入宣和諧
怪石常橫粉本看三年重作還鄉夢侏儻僦歌相送
金壓蕭雲行李遲船因陸賈歸裝重同舟人欠水衡錢
羽化銀杯意灑然元振萬金揮手盡長康厨內空雲烟
還家身世兩蕭條流落江湖酒一瓢遊子青衫餘兩袖
畫師白髮老三朝人生意境何偏仄盛名坎壈如一轍
但使文傳黑水碑奚須家住黃金穴春來日日鳥船通
猶道夷王遣問恭七十二島依然在只隔人間海一重

題陳古漁詩卷

新詩一卷勝方干當作楞伽靜夜看孔翠屏開花爛漫
清商琴老調高寒地當一代悲歌易胸有千秋下筆難
我學王戎留贈語森森更願東長竿

王卿華輓辭

諱復旦杭州人丙辰孝廉侍御公文潛之子會
試不第繼死長安

琅琊公子少年日平康意氣東阿筆玉貌朝看驚嶺雲

金鞭夜醉西湖月西湖有客正垂髫杵臼相逢遽定交
雙聲笑徹烟霄上把袂詩歌碧樹高蕭郎騎馬走京華
公子秋風桂亦花此際烟波人萬里此時別緒字如麻
流星馬遞泥金紙大父懽呼阿父喜寸厚家書拆忽驚
當頭只說袁才子袁安躡蹻撲燕塵乞火先投御史門
鴻博已傳韓愈罷棲身誰念趙岐貧果然屋好烏亦好
先把牛心啖逸少延譽真同許子將少年我愧蕭淵藻
大被常教氣類親風懷共取明燈照朝朝索米向長安
身賤由來作客難子鶯殘炙垂涎處苦賜翳桑幾頓餐
可憐客路暫逢君君又還家我失羣借馬送行秋夜月
含愁極目楚天雲會將阮籍窮途淚痛洒羊欣白練裙
明年身添到蓬萊驄馬門前五笛哀華屋誰知一朝變
滄桑從此萬重來八十封翁扶櫬歸孤兒一隊繞船悲
鍾君阿鶯無人嫁仲郢烏臺有雀飛王郎再應公車試
往日繁華如隔世落第羞看紅杏花還鄉怕挽青絲轡
誰云生死見交情任昉兒郎局已成不學王孫依鮑氏
甘心慶父抗軻經三更孤燕空梁墜萬里書燈鬼火青
城南婦作刀頭夢易水風吹變徵聲白骨天涯蔓草寒
招魂誰唱念家山回頭酒綠燈紅事盡作輕塵短夢看
記儂奔走江南道兩度逢君覺君老路遠偏教得信遲
官卑祇恨酬恩少二十年來鬢未霜哭君三世淚沾裳
寢門一奠知何日金谷園空宿草荒

哭沈補蘿

八法書亡索幼安蘭亭雖在酒壚寒欲知太古先看面
從未朝天儘作官垂死交情秋握手半生家難老傳餐
公貌奇古七攝縣令從未入都老病寄膳以終誰云遺墨千年貴我是同時得
已難

傷心張耳鬢如絲曾見夷門大會時四海耆英今日盡
三朝遺事夕陽知風摧漢代靈光殿名重蕭梁老婢師
最晚逢君偏早別淚痕空灑白楊枝

題故人畫

有序

晴江明府畫梅絕奇但化後人藏者輒屬予加
墨以晴江之好予也再來叅戎與晴江同姓甚

懼丙子秋引例來請值予病牯皮置高閣主人
疑予忘之矣今年夏五展卷見梅花如見宿草
與其上求巫陽不若招魂于紙上爲書一律質

生者質死者并質之梅花

幾番怕見晴江畫今日重看淚又傾十四幅梅春萬點
一千年事鶴三更高人魂過山河冷上界花輪筆墨清
聽說根盤共仙李暗香疎影盡交情

春草

江城三月草烟綿有客憑闌感歲年雪後人歸春滿地
馬頭風起影搖天清明細雨長亭路畫角斜陽南浦船
欲采蘼蕪歌水調幾回愁過大隄邊

誰家牧笛下牛羊踏到襄城舉國狂一片綠成蝴蝶路
幾叢眠作酒人床印來羅襪春痕軟望去裙腰別恨長
記得斑駁嘶暮雨青袍今已誤蕭郎

黃驄一曲艷陽歌撩亂春愁起碧波寂寂鳥啼新院落
萋萋人感舊山河根高自占風雲早物賤偏沾雨露多
莫怪已芟生轉密此身原要托烟蘿

玉鈎斜月冷黃鸝渺渺寒蕪夕照西青入窮沙頽歷日
繡完平野失春泥三生蓬海騷人老六代雲山燕子低
說與東風合惆悵剪刀雖好葉難齊

十二瑤階也托根野心只是厭紅塵開花自笑無名字
采藥時逢有異人恍惚池塘舊夢分明書帶認前身
年來似勸天桃隱遮住漁郎不問津

栽培不仗主人翁自立斜陽自偃風空苑儘教隨意綠
落花借與滿身紅千般甘苦嘗難盡一局輪贏鬪易終
我欲踏青何處好琴河西畔板橋東

咏錢

誰開九府製泉刀從此黃標又紫標千古帝王留字去
萬般人事讓兄驕椒房手迹傳唐代堯廟碑陰記漢朝
莫說仙家最清冷也須金液上丹霄

不須薇蕨說高風到底夷齊是命窮剪紙賄能通鬼國
博梟天尚借劉翁杖頭有處春堪買坐上無時酒欲空
怎怪南唐痴長老心經一卷寫當中

人生薪水尋常事動輒煩君我亦愁解用何嘗非俊物
不談未必定清流空勞姍女千回數屢見銅山一夕休
擬把婆心向天奏九州添設富民侯

牙籌且莫惱王戎本草嘗來味果濃五福富登洪範傳
六官人愛大司農分明輪廓無方寸頃刻風波有萬重

怪我緣慳君欲去祇須臨別少從容

張燕公有
錢本草碑

五銖衣薄稱閒身縮罷銅符早閉門萬選儘憑詞賦力
半文不受祖宗恩搖空撲滿心原淡獨飲廉泉體自尊
記得清明分白打開元兩字最消魂

風吹苻葉滿池斜老去持籌敢自夸早買名山非壟斷
不騎仙鶴也豪華富徒慳守貧何異來得分明去亦嘉
我有青蚨飛處好半尋烟水半尋花

錢稼軒少司空奉

命棲霞畫山過訪隨園

司空工作畫

聖主教看山感舊懷殘客穿雲到此間

高軒紅雨染空谷白駒閒帶我烟霞去仍歸侍從班

梅雨

梅子黃時雨潏潏最不同慣來人意外偏灑日光中滑
徑愁芒履空堂躍水蟲采蓮差可喜處處畫船通

題柳如是畫像

生綃一幅紅粧影玉貌珠冠方繡領眼波如月照人間
欲奪鸞篋須絕頂懷刺黃門悔誤投遺珠草草尚書收
黨人碑上無雙士夫壻班中第二流絳雲樓閣起三層

紅豆花枝枯復生斑管自稱詩弟子佛香同事古先生
勾欄院大朝廷小紅粉情多青史輕扁舟同過黃天蕩
梁家有个青樓樣金鼓親提妾亦能爭奈江南不出將
一朝九廟煙塵起手握刀繩勸公死百年此際盍歸乎
萬論從今都定矣可惜尚書壽正長丹青讓與柳枝娘
靜坐

寄徵士薛一瓢

南海有隱士疑是青城君道姓稱黃石問家指白雲精
心通九畧逸氣橫三軍棄其孫與子孤處空江濱獨攜
天台女飄飄金霞裙梅花開玉牖水仙時一醺我亦或
其間芳訊聞氤氳無端自謫落從茲仙凡分風事不可
馭元理無由問何時青鳥來同驂鸞鶴羣

高情

一紙家書萬里情八年人老杜鵑聲胡威贈絹知蠶好
薛女題箋想政清署外山光雍齒廟馬頭月色錦官城
韋莊詩集韋臯業珍重郎君蜀道行

讀王荊公傳

青苗幾葉起風塵孤負臯夔自待身底事經神有緣法
周官偏誤姓王人

齒痛

百年過四旬老狀一齊赴但願無所苦聾盲任所付惟
茲齒兩行朝夕待汝哺相鼠尚有牙飛鳥豈無嗉編排
三十二落落晨星布隊缺衆乃搖左移右不固忽弱一
个焉墳起血沮如臨食輒三嘆呼晷每百度投梭嘯益
悲漱石礪如鋸似屐入門折爲牛孺子仆元謨眉不伸
丞相茵屢吐類炙十重艾勝飲三斗醋說士不覺甘噉
名亦無趣調語便聱牙反唇如有訴徒搖子公指愁對
亞夫箸噬嗑爲已占大烹向人妬腕腕起復行呻吟朝
至暮五漿三飯時隙罅難調護狼藉小穉穉如入大盈
庫已困楚人鉗復作黨人捕急命大老嫗發難學鼃錯
金簪爲戈矛冰麝爲俞跗蠕蠕黃頭蟲擒出竟無數客
容旣甚猛尸汝猶可怖譬如漢宦官雖誅國已蠹次日
嚼復嚼痛止齧恰腐又如買臣妻苦留終欲去欲去未
去間勃谿終日怒咄哉汝朽骨無情心不恕我雖仗汝
餐汝亦得我助弱冠啖紅綾韶光不汝誤有時拈花笑
莞爾將汝露談天吐玉屑觀畫設寒具似我作居停將
子亦母教胡爲憎酸鹹瓜葛全不顧三餐自作孽四十
已見惡其餘編貝公效尤更可慮勸齒學宰相伴食且
餐素母學小丈夫悻悻不肯住更學古君子絕交須念
故母學暴富兒登時棄瓦注叩汝一千回賜汝三日醮
吾將鳴天鼓更請黃帝鑄

偶然作

三寸鼠鬚筆千秋爭名家譬如一鮒魚而祝穀百車叅
軍圖作佛母乃願太奢可奈日與月已如赴壑蛇傳名
無竹帛成仙無丹砂賴此文字間著作爲生涯後人就
知我卑卑已可嗟萬一再蹉跎輪迴可恃耶

山居無所事遁木復遁土東聽繩繩築西聞丁丁斧三
百有六旬所費亦難數戚里憐我貧切切相規阻豈知
君子心此中固有主未能議明堂爲國造區宇又無厦
萬間寒士同安堵就此蝸牛廬結構且楚楚起伏寓文
心疎密占隊伍栽花如養民建亭似開府可惜錢刀空
英雄難用武始知諸葛公糧盡退軍苦
讀書不手記一過無分毫得句忽然忘逐之如追逃見

書如見色未近已心動只恐橫陳多後庭曠者衆所以
某日觀手自識其腦能着幾緡屐此意亦苦惱

身無活人權不憂溺與飢身無効人權莫談是與非當
時石戶農牽羊海上遯耿耿方寸間隱隱萬言論願揖
衆臯夔待儂見堯舜

顏回無宣尼一瓢何足筭宰相三十年雖庸有列傳君
子愛其名名權非我擅但看十七史遜我者大半

太上貴道德其次務施報惟其本此心所以有忠孝快
哉孔聖人報怨稱直道英雄萬念灰此意終了了矧吾
少也賤恩仇豈云少逝者已如斯前途惟有老再拜漂
母祠涕泣傷懷抱

開卷見古人開門見今人古人骨已朽情性與我親今人乃我類嚼蠟聞語言寧與木石居不與俗子俱欲見何代人但翻何代書

平生多嗜欲所憎惟樽酒味與絲竹勉強相支吾其餘玩好類目擊心已慕忽忽四十年味盡返吾素惟茲文字業兀兀尚朝暮晨起望書堂身如渴猊赴高歌古人作心覺蛾眉妬自問子胡然不能言其故

憶昔垂髫年讀書葵巷中先生出見客弟子偷餘工聞客有科名仰之如華嵩家人多窺探嘖嘖羨其容于今二十年都成可憐蟲孝廉難餬口進士愁飄蓬酒味減京口米價增江東貴爵而尚齒吾將笑周公

東漢舉孝廉四十方辟召吾年正四十自覺已衰老問其所以然入世嫌太早薪勞脂易枯刀用鋒恒少傷哉出山時意氣凌八表一自識行藏不復恥溫飽何圖大鵬翼化作小山草懶惰便清高巢由安足道

悲哉秋爲氣草木凜若霜我身非孤桐逢秋如探湯又如古塞上防秋羽檄忙六年三大病八月之中央自知疎狂性肌骨多開張忽受金風斂相戰何能降吹霎卽飢噉藥石難周防長跪奏白帝臣請召雲將共留東皇駕熙熙遊春陽毋使一葉落惹我寸心傷其旁有宋玉涕下霑衣裳

汝賤非汝拙汝貴非汝才不能領此意青天生禍災禍

小倉山房 卷十三 三
福何足論所惜九重恩萬世一時遇而無雲雷屯顏駟
用太遲終軍用太早所以漢家業人才多草草
聖人重躬行不以道自拘其治貴清平科條簡且疎唐
虞至商周一千年有餘治民無多談傳心無異趨但有
謨誥語而無官禮書六經盡糟粕大哉此言歟周末始
文勝漢興廣徵儒遂有叔孫通繇蕞野外居更有魯徐
生習禮爲大夫瑣瑣角毛鄭空空談程朱求之日益嚴
失之日益迂未必兩廡坐果然聖人徒未必兩廡外都
與聖人殊聖人不復生我夢終遽遽

聞雷

六月雲雷盛霹靂西南郊震殺一田夫其隣何曉曉道
是無惡狀蒼蒼刑罰偏我往謂其隣爾毋言逆天天生
復天殺於汝何尤焉隣曰大不然人心如其面于心有
不安父母貴幾諫晉獻殺申生春秋有貶辭宣王誅杜
伯左儒請死之三槐與九棘要使天下聞雷雖象其背
模糊不成文謂是前世孽前生天夢夢謂有隱慝焉曷
不示之衆擊牛不擊虎勝之不爲武擊賤不擊貴雷乃
勢利祖巍巍真宰心與人異好惡兩師與風伯胡不救
其誤予聞隣翁語惻然不能言死者良已矣無人招其
魂

美人彈琴圖

今夕何夕銀河明單鳧寡鶴升天行幽蘭花開碧雲斷

美人獨坐難爲情一張青琴當郎抱不肯無人輕有聲
疑是卓文君彷彿趙飛燕義髻濃梳洛水粧烟華搖蕩
香雲髻織罷流黃手爪傷久疎雲雨朱絃變蕩子去關
山烏啼蕙草殘孤鸞欲作語對鏡發長嘆不愁明月空
床冷只恨陽春識曲難何處分釵王敬伯何時按拍董
廷蘭北斗離離挂寒碧妾心宛轉與琴訣一片瀟湘指
上波萬重幽澗花間雪彈畢還將古錦包曲終不覺衣
裳濕四絃三調本淒涼琴語琴心暗裏藏只描一幅相
思態寄與千秋播拈郎

寄懷歸愚尚書

天與高年享重名明經晚遇比桓榮詩人遭際無前古
海內風騷有正聲白髮歸來雙俸重青山題罷九重
賡戴公園上書銜處更命春官典六卿

曾拖金紫侍東宮鶴禁龍樓獻樸忠斥去邪蒿開苦口
折來楊柳勸春風賀循印綬恩方渥疏廣都門餞已終
今日商山好芝草青青猶照夕陽紅

金鑾殿上咏霓裳三次同年夢最長

鴻詞科鄉會試

吳郡聲聞

張子布鏡湖風月賀知章傳人自古前生定酒客於今
舊雨涼何事蒲輪遊白下不來小住說滄桑

黎生鶴髮捧雙魚寄得昌黎薦士書

公以書薦閩人黎良行

老去

心情真健在秋來杖履更何如愁生蕭寺雲飛處露下
橫塘雁到初記否隔年河朔飲張南周北又離居

奉和揚州盧雅雨觀察紅橋修禊之作

雷塘七里小橋紅，隋苑烟花闕苑同。
天子停鑾留勝蹟，大夫修禊采南風。
黃金宮闕連雲起，白塔毫光照月空。
二十重春萬層景，牙牌標出水西東。
紫竹亭西歌吹聞，傾城車鬪笛紛紛。
楊花風散春隄雪，水面燈涼日暮雲。
蕩子黃鸝金縷曲，女兒高髻藕絲裙。
人間此後論明月，未必揚州只二分。

歐蘇當日擅風流，重整騷壇五百秋。
四面雲山新水榭，六朝歌管舊春愁。
人騎仙鶴尋詩社，月送笙簫上酒樓。
莫怪梅花東閣盛，年來何遜領揚州。

二月迎鑾理畫橈，兩扶筇杖到紅橋。
時非上巳春猶淺，遊過鈞天夢未消。
綠綺琴傳廣陵散，青山人隔白門潮。
憑公好取燕城賦，畫作屏風寄鮑昭。

寄西川方伯徐芷亭同年五十四韻

鵬翼三千里，霓裳十九年。
斯人敦古誼，舊雨最周旋。
飲罷江南水，恩來蜀道天。
屏藩龍節重，玉斧繡衣鮮。
帝愛文翁化，人思邵伯賢。
道行堪莞爾，遠別轉淒然。
燒尾蓬池後，回輪弱水前。
記嘗千日酒，同惹一爐烟。
手學飛龍字，歌翻槃木篇。
早朝清漏動，月朔課期傳。
燈借徐吾壁，街揚祖逖鞭。
雙棲雞樹側，遊戲濯龍淵。
王儉芙蓉幕，徐陵玳瑁筵。
有花皆共賞，無月不同圓。
上苑香車鬪，宮袍蜀纈纏。
通家來姊姒，華屋語嬋娟。
爾我忘形極，妻孥

樂事偏爲遲兒繞膝各想妾隨肩濡蠟仍呼酒燒蘭更
擘箋九霄風震盪一日事推遷海沒神山影枝分太華
蓮我親刀筆吏君督水衡錢喉舌分曇首池塘夢阿連
相看飛鷁退同作厲人憐俸寄黎陽土書亥計吏船人
天情渺渺縞紵意懸懸已見肱三折重鳴鼓爾甄武安
仍起病樂毅再遊燕坎坎能酤我泠泠續撫絃秦關秋
萬里農部夢三鱸鹿幘仍棲洞貂冠獨耀蟬啞峒章貢
嶺皖口大龍巔草木威名重陽春玉律宣停驂來建業
訪舊到林泉碧水金鞍照紅旂翠柳牽遠山遙對酒好
句贈如仙回首鈞天夢難忘香火緣松高青似舊瓦賤
壁難聯論蜀相如去擁旄嚴武專巴渝新舞曲夔府舊
山川叱御驚桐鳳籠街襍杜鵑耶筒盛菹醬驃鴿闌丁
零棧道初飄桂新霜正折棉材應儲杞梓德可化鷹鷂
雨露銀鍾沃功名銅柱鐫依然丹禁筆還作太宮椽有
客南河畔含情北斗邊孤雲心倦矣戴笠意終焉沈氏
郊居賦方家泊宅編哦松朝掩卷種漆暮鋤田望氣私
心祝看雲終日眠遙知尋杜甫未免憶焦先潮折終歸
海風輕只墜鳶何時蔣生徑重挹故人旃

二月

二月湘簾漾曉風倚闌人對碧芙蓉
春愁不是無形物但看楊花一萬重

偶過

偶過青溪上濛濛野水春釣魚竿在地不見釣魚人

海桐書屋卽事

水軒古豪士雅志扶國風萬里遊五嶽一窗栽雙桐慨
念昔金陵何沈稱宗工千秋少替人誰歟繼其隆遺響
撞布鼓張旗招雲龍丁丑八月六澹月明高空冠蓋集
東南華裾飛烟虹棋聲答風竹酒氣熏芙蓉秋葵照秋
士通理協黃中梁園無罰蓋謝莊有談功花籌傳未畢
銅鉢韻已終餘事賦古琴尚論及江東題有琴賦
魯肅論當今
聖人詔將詩試南宮吾從蓬山謫未忘清廟鐘願與諸
君子賡歌垂無窮年年對嘉樹永永賦角弓

寄香亭代柬

高城秋未落作客汝先行白髮空山夜青燈獨坐情池
塘尋遠夢兄弟感來生極目天邊月清光送雁聲

禹貢徐州域相依張建封空樓尋燕子舊幕想芙蓉河
決城三版官新贖萬重主勞賓可想幾見汝從容

弱冠編詩集彭城與鳳陽馬頭皆楚漢筆底自宮商地
盡江南界秋高古戰場騷人風骨老強半在他鄉

小草當荆樹分君亦偶然如何絡秀志不結女嬃緣贈香
亭鳳簫女
嬃尼之扣扣環仍繫盈盈月待圓采春囉噴曲空唱

想夫憐

燕姑初徵夢添丁賀者譁偏凋將秀稻又摘早秋瓜老
母堂前膝佳人雨後花風懷吾最達未免惜年華方姬
半產

木葉不知老當秋尚亂飄蟲聲入山大風力出城驕一
別歲將暮相思路正遙家書最珍重封卷學芭蕉

方姬未大期而免乳意忽忽不樂醫者呂東臯云
女人望子如秀才之望榜愛其罕譬雅切爲詩謝
之

蕊榜泥金願久償忽教此恨落闈房天桃子墮花含淚
紅樹心孤蝶怨霜樂府聽歌康老子燈花偏惱謝秋娘
多情只有淳于意檢點龍宮賜禁方

吳元理秀才是子宰江寧時所拔童子以詩來謁
粲然成章喜而有贈

十年不見張童子一卷公然員半千繞筆蘭荈花照水
盤空秋隼影橫天青山置酒吾將老白下稱才汝最先
當日門生今小友早探金海躡飛仙

熊安亭公子之官楚中以舊時松竹讀書樓冊子

屬題

蕭郎吹笛出南都肘後離騷有畫圖行色君山秋月好
書聲江左竹樓孤詩人慣作州司馬神女遙迎楚大夫
倘采芙蓉花萬朵不應忘記白門烏

題李晴洲天際歸舟圖

作客天津未半年思歸便畫送歸船篙工添上三枝槳
猶恐春歸在客先

隨園西北有高樓樓上長江接檻流無數颿檣天際影

可憐幾箇是歸舟

八月二十九日偕溫皆山莊念農遊棲霞

西風愛客作山行
細雨明朝換老晴
飲馬後湖秋水色
迎人前面打禾聲
遙看高嶺新墻出
曾過鑾輿大道平
一路齊梁舊雲物
銅駝石馬盡關情

晚叩僧門尚未扃
張燈先到話山亭
峯如起屋天原巧
水可流花地忽靈
九折廊隨幽澗轉
五層臺隔竹光青
穿林更有金衣鳥
啼出秋聲當笛聽

來遲悔過桂花香
猶記前春去住忙
怕隔歲鈞天非舊夢
捲簾紅樹瓦新霜
萬松鬪健擎雲立
千佛浮金照影涼
結構有人心未已
掉頭私自向斜陽

念農督工棲霞意有改建

回車重上最高峯
秋後黃梁萬頃同
宮殿忽藏雲世界
江帆齊出水西東
看山到頂心才快
待月回身眼更空
歸去烟霞應滿袖
遊人來自半天中

鏡

盈盈一水寫風神
惆悵山雞舞罷身
望去空堂疑有路
照來如我竟無人
得知宜稱粧應改
解共悲懽汝最真
願取蟠龍安四角
滿林花影盡橫陳

簾

珍珠顏色月波光
只隔遊蜂不隔香
一道疑城花隱霧
萬條斜竹水成行
蓬山珮響仙彌遠
深院風停日更長
搖蕩春痕鈎捲未
銜泥燕子待升堂

床

小眠齋裏倦琴書每覺藜床味有餘
一夜送人何處去百年分半此中居
金燈聽鼓應官後紅袖抽簪乍上初
兩種風情最堪憶梅花吹落水窗虛

燈

別酒淋浪夜雨聲空山紅處野風驚
並無喜事花長報爲有黃昏色轉明
歌舞當塲春夢短江湖回首玉堂清
除將書卷雲鬟影不領銀釭一點情

扇

齊紈巧製愛天工白羽臨江水照空
小撲流螢花徑外分涼熱客樹陰中
生無愧面遮寒士秋有餘恩感漢宮
憔悴年年箱篋裏誰知搖手滿懷風

尺

典衣從古屬周官分寸由來熨貼難
織布新人休護短滿城高髻太嫌寬
明堂補袞身猶在大樂調鐘興已闌
我欲通天臺上表羣才交與此公看

杖

剡水雙藤健絕羣偏於足下最殷勤
年來孤往常無路海內相扶尚有君
小拄心知深淺雪橫拖身逐徃來雲
鄧林豈少狂奔者可奈虞淵日易曛

帳

甲乙流蘇事事非誰傾海水向羅幃
垂雲深護鴛鴦穩

越境難防蝴蝶飛白鳥有聲喧外陣紅燈無力透重圍
愁他酒盡更殘夜遮莫離人獨自歸

香

老去荀郎感歲華簷唐粘濕尚成家空中仙過靜聞樂
墻外月明知有花雞舌自含芳訊早旃檀偏抱逆風嗟
何當盡取懷中字燒作青詞上紫霞

和冷長卿秀才九月開牡丹之作

三月繁枝九月抽驚看穠艷捲簾鉤紫雲題句因紅葉
青女飛霜到絳樓花自過時仍富貴天無成見作春秋
桓榮晚遇顏郎否各向尊前掉白頭

十月九日飲江防司馬陳省齋署中坐客汪君吹

簫吳君鼓琴姚君製硯相錯勸觴

碧雲欲墜秋滿天黃花不語含素烟金簫玉琴橫几前
江州司馬開華筵控糟凍飲酒材全紅虬脯雜元兔肩
吳剛半醉調朱絃三湘兩峽鳴清泉汪倫弄管銀字圓
如怨如慕愁嬋娟須臾合奏相接連簫史請後伯牙先
孤鸞低語老鳳憐水尺未斷冰絲牽口所欲轉手亦旋
角聲不厲羽不偏如雁拍水珠流淵元雲白鶴來翩翩
主人六十未華顛宛若世外餐霞仙平生妙筆煨龍眠
今夕何夕勝事聯胡不畫圖海內傳更有姚君琢硯田
青花紫文開陌阡能將金石蘭亭鐫枚也一技無有焉
虛此良會心惓惓聞南齊賜宴年拍張琴舞琵琶邊

別有臣歌封禪篇敬請效尤依古賢含笑獨看郇公箋
送上元令溫屏山刺通州兼呈其五兄悟仙

聽唱驪歌小雪天一門人別六朝烟思量二十年前事
早撥朱琴第五絃

斯人風骨最清狂不逐鴛班逐雁行此去通音真小悟
萬重海水自宮商

王郎一曲唱初終阿弟旌旗照眼紅始信東山愛絲竹
官聲不累小安豐

白下風烟接素秋三年鴻爪紀同遊棲霞晚翠青溪雪
併作離人一段愁

鳳簫二十六韻

鳳故待年女也長而痘痂着面乃聘陸姬以乞香亭又復不果有蒙

古將軍聘之簫請行

鮫室泣冰綃秦樓別鳳簫碧天紅線遠法曲紫雲飄玉
自崑山種珠從合浦招目成初見處姪變可憐宵解誦
靈光賦纔勝金步搖留仙風裏待按管月中調秋水明
清暎修篁束細腰近花香轉澹采藥路非遙一日麻姑
爪三生脂夜妖壽陽梅點點獺隨影蕭蕭灑面雲爲雨
分香手握椒看春心未滿得隴興仍饒二月姑蘇舫江
東大小喬家雞忘逸少遠水聘雲翹已見新加舊難堪
暮與朝瓜期遲短漏眉恨鎖長條欲住情終怯將離夢
復繆鵲情太薄羸螺話空撩竟作烏孫主甘從皂北
鷗宜城嫁琴客瓊智降弦超俟語吳音斷琵琶塞草凋

卿悲秦吉了我唱董嬌嬈宛轉遺簪戀淒涼舊粉消人
間無正色花信有驚飈願繫他生臂休憎後續貂思量
主人意海水作春潮

答魚門覆舟見寄

久別青琴海上音忽然彈作水龍吟文章偶有清流禍
神劍終無化去心長願伊人歌宛在何妨與世暫浮沉
水經註疏河渠考此後輪君閱歷深

年來陶峴卧烟霞不泛張騫萬里槎樂府怕歌公竟渡

輕鳧且傍水爲家

易林見雁啞
以水爲家

天邊酒賀重圓月池上

風驚未墜花聽說寸函隨隻履轉疑龍女愛瑤華

聞夫
去一

履鄙人書一函

小倉親種

詩集卷十四

親種橫塘楊柳枝六年人恨采花遲關心一搦纖纖手

長日章臺竟弄絲

簫竟適湖州絲買

涼月香燈夢未消青衣作賦誚張超鳳凰飛去簫聲遠

不管梧桐葉尚搖

樊素歸時淚幾行香山心也費思量回頭自顧蒼蒼鬢

留與他生願轉長

長安訪客

風輪蕩陸遊二老委化相

時感

夜訪山中客濛濛月色凝敲門人未覺仙鶴一聲應

向枝

如嫁女已筵日在往事阻佳期遲

先

相有

老梅解春意後風犯雪揚幽姿

卿志秦吉了我唱童嬌宛轉遺替戀凄凉舊粉
開無正色花信有驚感願繫他生臂休憎後續
去齊山中客猶索陶可幾婦門人未覺山歸一
鞞

答容門覆舟見寄

留與山至願轉其忽然彈作水龍吟文章偶有清
樊素韻却氣幾行香山心也費思量回更自願蒼
不曾哥麻葉尚辭此後輪君閱歷深

京月香登夢朱前清太并風前翅跋鳳凰飛去
疑日草臺資我絲
蕭京處也他絲買

疑重對對對對對六辛人別采芬感關心一
賦

賦

小倉山房詩集卷十四 戊寅

錢唐袁枚子才

答髯孟八日見懷

青龍在戊己七月天漏不止風絲絲東皇太乙行舊雨

髯孟太守貽新詩山人閉門無一事得詩大喜親歌之

音豪調逸趨慢繁義和敲石鳴玻璃人日留人記往歲

朱雲徐樂多文詞 草衣君家夫人揚竈坐安成之食供

晨炊一朝風輪蕩陳迹二老委化相參差撫時感事兩

眼濕春縱不語能無悲春晴便覺百花迥故意風冷凋

青枝譬如嫁女已筮日往往事阻佳期遲 先生甥館謝郎以疾未婚

之 故調惟有老梅解春意凌風犯雪揚幽姿苦恨主人不

飲酒玉樹照影無金卮且含數花若有待待我報與先生知

其年喜贈以詩

冬郎雛鳳作新聲啼出桐山第二清漢試籀書童子少唐多科目秀才榮膠庠舊夢吾能憶宅相高風汝竟成三十年來佳話在老夫悲喜若為情

送四妹雲扶于歸揚州

江城春暮水漫漫送汝揚州作季蘭十日新婚隨婿別二分明月待誰看貧家奩贈新詩好世上賢名後母難

妹繼配汪氏

記取張華箴女史莫教離恨目波瀾

秦樓挽手正登臨底事雙飛去不禁族犬爭看新婦貌夫憐暗慰阿兄心嘔啞江上三更檣安穩沙灘兩睡禽早采瓊花寄芳訊舉家翹首白雲深

贈徹凡上人

上人姓戴吳中江雨峯客也庚午寓江家相識今來白下云江氏一家暴亡感而薙髮

老友變為僧升堂一見驚滄桑方欲說涕淚已沾纓帶雨袈裟重披風貝葉輕儒門原淡泊留不住先生共記江家住星霜未十年笙歌猶在耳父子竟重泉有恨難詢佛無歸易入禪今宵掃塵榻且自證前緣

雨中見渡江者

春雨如絲織不清春風料峭可憐生山中尚要關門住
江上爭禁喚渡行人

二月十二日

紅梨初綻柳初嬌二月春寒雪尚飄除却女兒誰記得
百花生日是今朝

寄蔣苕生太史并序

壬申春過揚州見僧壁題詩絕佳末有苕生二字
字遍訪無知者熊滌齋前輩爲言苕生姓蔣名
士銓江西才子也因得芳訊寄余詞曲尤多今
年入翰林作詩寄之

豈菟花開月二分揚州壁上最憐君應劉才調生同世

稽呂交情隔暮雲大禮賦成南內獻清商歌滿六宮聞
爲他蕭寺題詩者曾把紗籠手自熏

回首蓬萊廿載遙喜聞詞客續金貂雲仙舊夢都陳迹
才子新詩正早朝江上書來三度雁青山人老一枝簫
何當置酒旗亭雪乞與吳趨送晚潮

哭王孟亭太守

難遣巫陽叩帝閭生芻一束酒盈尊故鄉采麥成長往
旅館遺孤尚候門粉壁未乾題了墨江風應送欲歸魂
編年詩放靈床上待我重泉再細論

意氣公然盛孝章三朝鶴髮老名場虞歌醒我千年夢
舊雨添君一笛霜卜宅臨江悲瘦信養生空論笑嵇康

青溪風月從今冷無數梧桐變白楊王學熊經鳥伸之說故有第六句

投尹六公子似村

陵陽有瓊樹密葉含青蔥繁枝八九條披拂蕊珠宮其
六尤娟娟臭與香蘭同柔心媚君子露眼啼春風三日
不相見芳訊誰能通賴有青鸞鳥傳書出烟中蠶眠字
數行素手贈芙蓉上言銘金石下言託始終

隋唐秀才科尊乃無與比不侍金馬門便領尚書使叔

季稍陵夷蕭艾雜芳芷吾皇重人才赫然降玉旨

大開明光宮徧試羣公子曳白愁張爽聲鳴悲侯喜六

郎獨不然奮臂書黃紙漢策貫天人唐詩協宮徵君

王笑而言自有真才耳歸鐫肘後印四字千古美日殿

試秀才佳話從汝始

我年如郎小初拜老尚書忽忽二十年郎年復我如尚
書麾旌旄四度江南車先生今鶴髮弟子亦蒼鬚惟有
諸郎君玉佩而瓊琚春華良可愛努力翔天衢歲星常
周天三吳豈久居君如上林花我如烟江魚青雲日以
密白雲日以踈殷勤復殷勤一字一真珠毋忘書中言
棄置在須臾

余春秋四十有三尚抱鄧攸之戚今年六月二十

九日陸姬生男不舉

半日爲人父三生事可嗟如何投玉燕忽又隱曇花壯
髮初離母長眉頗類翁木皮棺紙薄裹汝送泥沙

漫說胞衣紫莊公偏寤生來時即去路泡影度風聲碧
 海珠何脆桐花鳳不鳴親朋爭問信流恨滿江城
 小草留根易瓊花度種難琴從中散絕書付左芬看文
 葆衣空製璋聲聽已殘斜陽雖自好無補膝前寒
 老母含愁坐殷勤作慰詞道孫生有日恐我見無期此
 語何堪聽全家一味悲蒼天與人隔何處問靈龜
 書所見
 萬物赴生意不能無所求麟鳳至蟣虱亦各有營謀為
 佛為仙者刺刺尚不休何況侵晨鳥能不鳴啾啾我飢
 亦思食我寒亦思裘不謀固不可太謀亦徒憂適可而
 止耳如水行輕舟

深夜不熟睡早起顏色焦嚴冬不肅殺草木春蕭蕭人
 老而不死毋乃夜行勞神仙作狡獪千年為一朝畢竟
 當長夜獨醒亦無聊不如信天翁大化隨波濤
 呂布嚴酒禁符堅拒婦言頗遵先王訓而以亡其身要
 知天下事圓通理萬千何以稱英雄識以領其先
 我昨乘舟行順逆風有權我今靜掩戶有風無風然所
 以王秀之久宦輒不肯相傳勇退人次神仙一等
 賦詩似為政焉得人人悅但須有我在不可事剽竊昔
 有王家郎好學華子魚惟其太相同轉覺遠不如
 臯夔非命達共驩非命窮唐虞一千年司命者無功宜
 尼泣麒麟命始歸蒼穹吾官雖沉抑吾境猶從容日者

問支于一笑如耳聾欲知東方生惟有太王公

譙周

將軍被刺方豪日丞相身寒未暮年惟有譙周老難死
白頭抽筆寫降箋

周昌

遺孤共殉聞荀息越境能逃有正常何事黃羅負如意
但聞強相病朝堂

朱買臣

采薪歌罷雪花飄五十登朝氣轉豪殺得張湯刀筆吏
一行功已敵蕭曹

張禹

羽衛傳呼謁太師九重請訓萬人知先生開口君王拜
床上深深托女兒

叔孫通

軍謀休註漢官儀綿蕞荒郊事事非三代以還皇帝貴
兩生之後腐儒稀

朱栩

人各千秋有性情不圖禍福不圖名金丸冷落椒風斷
偏葬當年董聖卿

王儉

散髮斜簪侍玉除金鑾殿上酒酣餘拍張琴舞琵琶外
別有臣歌封禪書

范希文

黃閣風裁第一清
宋朝名相半書生
西邊經畧成何事
尚勸橫渠莫論兵

陶宏景

樓上三層道氣濃
永明求祿枉匆匆
先生綠鬢方瞳意
可在烏紗骨相中

郗詵

射策明光第一人
歸來香案筆當門
二千年後兒孫記
要報龍鬚老友恩

沈約

老去名場夢久消
青宮風雨隔前朝
內家尚識東陽客

白髮淋浪淚萬條

謝景仁

絃絕清商蠶餌絲
人才國運兩相支
景仁三十居郎位
司馬家兒事可知

王僧孺

賣紗東海遇中丞
兒墜深溝母亦曾
兒作中丞母何在
鳴騶引道淚難勝

病中作

余病中每夢得奇句
醒輒忘之今年疔作熱甚
似有霞帔者持紙求詩
余書萬樹接天風掃海
一人手結虹霓帶云云
其結句云瑤妃浴罷天

河窄熱退僅憶此三句似非人間語爲足成之
萬樹接天風掃海一人手結虹霓帶黃金梯滑升天行
鳳凰挽臂星辰迎風裳飄飄拜玉宇口含北斗與天語
天上美人半故人素手拈花相爾汝王母微笑不掉頭
癡龍小謫三千秋雲窗奏事不甚解畧聞海水西南流
宮漏蓁蓁天鼓急金輪影逼扶桑直三十六宮珍珠璣
瑤妃浴罷天河窄

鬪蟋蟀三十韻

兒時不好弄雅好鬪秋蛩老至興不淺率衆時相攻憑
軾觀壁上擊節鼓胡隴選材必大閱焚山輒搜窮得一
巨擘焉文瓷以爲宮樹之螿弧旗築壇招羣雄教戰如
峻訟持草開金籠其始體卑伏拘怒初興或徐徐短低
昂霜刃將交鋒牙摩疑喫兪頭觸愁共工彌明舉足跋
叔孫當喉搯道險一與一兩將鬪奔中伏已盪其腦搏
膺鉞交胸銜枚悄無聲連翼如有風瑟瑟齒擊響拂拂
長鬚衝微覺昆喙息愈增羅鉗兕射肩猶能軍傷股強
鳴鏃一擲出盆外如喝梟盧紅再戰不改期如學楚子
重摩壘更靡旌逐北如飛蓬帶斷狗于軍勇哉氣矜隆
奏凱唱饒歌鼓翅如金鐘漢有蟲將軍母乃汝同宗敬
汝矜而爭比黨非螭螭愛汝勇而仁螿人非莽蜂飲汝
以勇爵蝸觸慚尸囊偶汝以新牡字微聲雍雍十月入
床下懶婦驚殘夢寄語若蔗氏牡鞠休熏烘我續蝨蝨

傳自笑本雕蟲

偶成

事往百慮忘興來一杯執莫道勸無人青山酒邊立

遣懷

勸駕已無中執法起家曾作侍中郎不先詣客來還答
最愛看書過亦忘畎畝身閒供疾病功名事變入文章
較量六代風騷者可是南朝顧野王

才人已嫁邯鄲卒名士誰當曳落河出世風懷蝴蝶夢
傷春心事鷓鴣歌聰明得福人間少僥倖成名史上多
簾外芙蓉好顏色晚秋寂寞照金波

兩鬢霜侵百慮空願書箋奏與天公傳名早死皆高壽
肯樂貧家卽富翁執筆羅喉如上馬川心蘇綽本張弓
行藏此日憑誰問欲倩黃香賦九宮

病起對月

才卸藤床出戶前舉家驚瘦老親憐無秋不病中年後
有酒重歌碧月天燈寫黃花霜下影風留紅樹晚來烟
主人小與青山別觸目清光更宛然

客至

剝啄柴門響呼僮掃葉迎涼蟬知讓客且住一聲鳴

侍宮保遊棲霞作

偶見先生開病眼教陪公子看秋山來修勝景官俱集
去請鑿輿表正還小雪晴多冬更暖寒林霜重葉全

斑嫦娥似解雲仙會徹夜清光水石間

說到棲霞喜不勝尚書前世此山僧引來瀑布分三處
陡闢奇峯遠一層元老獨操風月主羣公齊獻匠心能
宮門管掃閒花者尚有詩人王右丞

江寧丞王香岩有宮階擁帚掃閒花之句

屈指奇觀數未窮就中最勝是行宮兩松收立黃門

外萬嶺橫陳紫閣東山似人才搜更出水如膏澤轉常

通知公不厭閒遊客一个狂夫履獨紅

從宮皆躡而枚獨朱履

同來不肯同歸去遊味從頭再細嘗山好全憑松色古
春回還盼水聲長亭臺分寸無虛設物力東南幸莫忘
休怪曲終仍奏雅打禾民正滿殘陽

余雅不喜次韻疊韵而宮保寄詩矧之不得已再

獻四章

尚書抱負何嘗展展盡經綸在此山一自風泉歸藻鑑
幾番畫戟帶雲還高峯未到亭先見古廟經秋草盡斑
同入江城將十日吟魂猶繞翠微間

看山立雪兩難勝隱者真如退院僧掃地松花堪滿掬

倚闌紅葉正千層石從偶得時憐巧泉竟搜來自覺能

蒙把烟雲付才子春華終恐愧家丞

公來扎云揮酒烟雲固當讓諸才子

石梁精舍望無窮欲取長江入帝宮四面仙雲生戶

牖六朝碑塔半西東斜陽善寫蒼松影春雨能教絕壑

通回首師恩與山色霜燈不負兩宵紅

疊韻詩如岩疊浪寄來雅味教深嘗山無官鼓更尤承
伴有郎君話倍長 玉輦尚遲三歲至松雲何敢一朝
忘書中苦訂重遊約會待梅花報曉陽

揚州轉運盧雅雨先生招遊紅橋集三賢祠賦詩

微雨不成雪曉日明紅橋轉運盧大夫折柬相招邀
艤舟傍采陌稅駕登州臯舊雨一樓滿新霜千林消半席
迎王粲終席來孝標王徵士藻劉侍講星煒宏正金蘭簿謝瞻雲
霞交缺面或十年抗手竟一朝繁星托孤月東海滙羣
潮非公扶大雅我輩何由遭

皇宋三賢臣高風不可再迢迢五百年此事如有待我
公領平山瓣香寸心在懷古此山中招隱此山外條蕩

千琅玕道是程公園午橋太史程公有遺命捨宅為阿蘭公

改祠三賢亭臺增舊觀既使故人慰復使先賢安時時
攜酒人處處憑闌干羣公且莫飲賤子有所思三賢在
何處一賢今在茲

大江橫天表南流入建康其中有青鸞三年不來翔偶
然乘螺舟掘衣君子堂朱履從而後輕蓬卷微霜水流
旗蓋影風遞松花香抗論至騷雅摩挲及圭璋烟帆歸
暮雲紅燈迎兩旁山高月猶小日短情何長強我盡一
杯為公留數行平山有時傾此會無時忘

揚州對雪戲作

求官不過張伯松求財乃學劉伯龍酒未引人着勝地

雪先含笑語春風問雪何所笑笑我不固窮秦散三千
金羣士鬪未終張湯解此意田甲與錢通賈生太將牢
繡衣譏賣僮天下要物戰國策南朝經國劉係宗汝皆
不知猶夢夢妄思弋獲如飛蟲可曾鮮卑語熟琵琶工
汝何不學漢賢良請除鹽鐵追虞唐又何不學張平叔
請去商人正國俗胡爲乎箕子不知長夜飲禹王且解
下裳行騎來仙鶴到處舞心鈎意釣若有情我道雪莫
笑生財有大道西施東施同一顰存乎其人分醜好孟
軻兼金受七十寧與蘇秦較多少我且招阿堵喚青蚨
天下英雄子與吾子之俗處須我洗我之雅處須子扶
人仗子求高官吾仗子求異書子爲人呼盧子爲我提
壺不爲風花水竹來用子便使文史元儒笑且呼不爲
璜琥盤匱來用子便使金童玉娥美且都天生萬物貴
用得其所耳守彼笨伯作虜胡爲乎錢神聞之手拍張
雪神聞之喜欲狂兩人悔過同商量共請女仙燒雪作
白鏹定教胡岳滿面生銀光

夜過金賢村明府卽席有作

揚州司寤許宵行夜踏新城進舊城一柱金筍兩行酒
有人剛唱淚盈盈

元官風貌似花嬌玉笛吹殘病未消生恐敬兒全體熱
教儂親手試瓊瑤

子野聞歌喚奈何盈盈方寸起星河要他步上蓮花怯

小製纏頭吉莫靴

程立萬贈靴元官嫌小

絲哀竹濫角聲殘雪滿前溪月滿山我本龍華同會客
愛吹尺八謫人間

送劉映榆侍講入都

征袍看拂九秋霜手採瓊花入建章遇我尚行前輩禮
因君轉憶少年場才高筆有東京賦官久舟無南越裝

劉督學

粵東 同日尋春同鬪酒當初曾忝蔡中郎

投鄭板橋明府

鄭虔三絕聞名久相見邗江意倍懽遇晚共憐雙髻短

才難不覺九州寬

君云天下雖大人才有數

紅橋酒影風燈亂山左

官聲竹馬寒底事誤傳坡老死費君老淚竟虛彈

有誤傳余

死者板橋大慟

讀葉下吟感贈半野園主人

主人劉姓字春池為織造計吏火焚其局凡家畜梨園樂器及所居園亭盡償入官

讀君詩罷我袖傷黃葉春生味獨嘗有此高才甘小隱

無多老淚落清商尚衣局盡三更火協律郎餘兩髻霜

舞扇歌裙如解恨也隨東海嘆滄桑

名園前歲看花時為訪姑蘇兩畫師照水那知風浪起

賣山翻羨子孫遲黃金放手來難再白雪彈琴聽者誰

惆悵英雄回首晚枕烟亭上負心期

推窗

連宵風雨惡蓬戶不輕開山似相思久推窗撲面來

陳古漁新婚

一卷文傳紀錦裙
鬢鬢夫婿久超羣
阮修婚費名流助
張祐才華女子聞
紅豆新詞南浦雨
海棠春夢板橋雲
匏瓜無匹今休感
已覓元霜見少君

標梅休註鄭康成
春晚花遲最有情
貧士家原須健婦
高人妻亦喚先生
承歡聽唱姑恩曲
擇木看飛谷口鶯
古漁成從此蘆簾燈似雪
吟詩一定是雙聲
婚遷屋

除夕雪宮保饋魚

對雪公憐把釣難
特教雙鯉贈魚盤
烹鮮厨下年將盡
燒尾龍門夢未闌
入戶似傳春信到
揚鬢猶帶浪花寒
披裘再拜烟波外
一物還供兩歲餐

除夕過李竹溪明府

冒雪尋君雪滿身
屠蘇臘酒正橫陳
光陰最貴是除夕
宦海相關惟故人
妾傳公方物盈門爭賀歲
小胥裁帖寫宜春
喧喧士女鼙鼙鼓
一路花燈歲已新

鑷鬚

我昔留鬚曾有詩
今年鬚白復鑷之
昔求其無今求黑
十六年來能幾時
終朝攬鏡不停手
田彼南山如去莠
衰草當秋豈盡除
素絲雖染知難久
白鬚臨行怒然訴
道君逐客真無故
拔毛與世既無利
吹毛於我又何惡
昔我在周朝
燕毛首坐何尊高
又嘗親遇宋襄公
不敢見禽稱戰功
於今骨肉連理生
忽然離別鴻毛輕
黑白

小倉山房詩集卷十五
太分古所戒虐老榮幼難爲情主人笑且言我本路塚
君自從諸毛來紅顏變青春春意雖不樂強自解英雄從
古鬚眉聞汝又一朝變微雪使我萬念成輕雲君不見
天公作春秋落花從容自去留人生老少無痕迹大家
夢夢登糟邱汝偏標題衰頰不思諱使我臨水顧影心
驚愁美不能鬪百草健不能挂雕弓旣不知何日爲人
作曾祖又不知全白可能參相公不如有心媚側室掃
除枯槁留青蔥誓不許汝先縞素星星滿把揮春風

小倉山房詩集卷十五

錢唐袁枚子才

子才子歌示莊念農

子才子願而長夢束筆萬枝爲桴浮大江從此文思日
汪洋十二舉茂才二十試明光廿三登鄉薦廿四貢玉
堂爾時意氣凌八表海水未許人窺量自期必管樂致
主必堯湯強學佞盧字誤書靈寶章改官江南學趨蹌
一部循吏傳甘苦能親嘗至今野老淚簌簌頗道我比
他人強投幘大笑善刀而藏歌招隱唱迷陽此中有深
意曉人難具詳天爲安排看花處清涼山色連小倉一
住一十有一年蕭然忘故鄉不嗜音不舉觴不覽佛書

不求仙方不知青烏經幾卷不知樛菡齒幾行此外風
花水竹無不好搜羅雜碑雀錄盈東箱牽鄂君衣聘邯
鄲倡長劍陸離古玉丁當藏書三萬卷卷卷加丹黃栽
花一千枝枝枝有色香六經雖讀不全信勘斷姬孔追
微茫眼光到處筆舌奮書中鬼泣鬼舞三千場北九邊
南三湘向禽五嶽遊賈生萬言書平生耿耿羅心腸一
笑不中用兩鬢含輕霜不如自家娛樂敲宮商駢文追
六朝散文絕三唐不甚喜宋人雙眸不盼兩廡旁惟有
歌詩偶取將或吹玉女簫綿麗聲悠揚或披九霞帔白
雲道士裝或提三軍行古塞碧天秋老吹甘涼或拔鯨
牙敲龍角齒牙閃爍流電光發言要教玉皇笑搖筆能
使風雷忙出世天馬來西極入山麒麟下大荒生如此
人不傳後定知此意非穹蒼就使仲尼來東魯大禹出
西羌必不呼子才子爲今之狂旣自歌還自贈終不知
千秋萬世後與李杜韓蘇誰頡頏大書一紙問蒙莊

正月二十二日紀事

尚書公餘發幽想新歲不見詩人往顧命材官召某來
白雲可覓人難訪點也絃歌聲正希聞呼身作輕鷗飛
後堂直入無絲竹絳帳一枝紅蠟燭初將古玉辨琳琅
繼取蟲魚別印章吟詩風戛幽窗竹論史秋生舌底霜
野人看書如看水眼光到處狂言起當仁不肯讓先生
狂狷惟聞裁小子五歲郎君出款賓三千弟子幾人存

重提知遇當年事愈覺師生此日親官鼓鼙星欲曙
山人長揖還山去送客燈明使者衣回頭月照將軍樹
臨行雙贈紫羅囊爛似天孫雲錦裳此意明公應有在
教儂佳句好收藏

答周幔亭山中招友一篇

兩山屹相向中有兩賢居兩賢時相招歌呼相唱喁一
賢幔亭子昂昂千里駒能畫周天星帝座通嶮呼能測
長江線胸中橫具區執削道所記羲農黃唐虞蒼布偏
褰衣鉢冠弁棧車筮宅賦囚山清涼割一隅一賢隱隨
園玉佩而瓊珞挂冠十二年栽花三千株所居小倉巔
赤壤雜墳壚胚胎於清涼其氣廉以疏兩山無兩賢岌

岌徒清虛兩賢無兩山兀兀空蓬廬而今旣雙得彼此
相夸譽我負子則戴子耕我則鋤雪海我已足松濤子
有餘淳于飲一石孟公飲一盃酒戶無大小醉鄉有乘
除此外來諸賢招之相與俱徐淑工丹青蝴蝶夢遽遽
黃香賦九宮文史爲嬉娛王涂汝芳隣詩律追唐儒獲
齋我從昆仙履鳴雙鳧如山聚衆峯如水滙羣湖如樂
合宮商如蛩負馱驢琴彈左瑟應鷺立旁鷗趨招友得
此樂千金抵須臾僕乃掉頭笑如斯而已乎我請爲大
招與子相擲揄擊筑招漸離試劍招風胡挾彈招韓嫣
采桑招羅敷我若爲天公玉女常投壺我若爲宰相子
路執金吾我若大勳貴驅使霍家奴於今皆無分且自

招其徒不招漢灌夫酒氣太豪粗不招石季倫俗物矜
珊瑚不招袁彥道無賴喝臬盧所招皆目前一一與人
殊招月使升戶招風使當鑪招葉爲茵幄招竹掃行厨
禮從野人野谷號愚公愚牧童牛戴牛酒器觚不觚若
非歌纂纂定是唱烏烏有花皆九錫有賦必三都山對
人而態活水得主而難枯星聞歌而欲聚鳥結伴而鳴
舒各招所招客各著所著書子招我未有我招子亦無
若比淮南王招隱終何如

隨園張燈詞

隨園一夜鬪燈光天上星河地上忙深訝梅花改顏色
萬枝清雪也紅粧

金粟分行綴玉蟲淺紅相間又深紅隔山人唱霓裳曲
笑指先生住月宮

高下樓臺列錦屏紅珠歷落水雲清嫦娥似讓燈光佛
捧出銀盤不敢明

熱戲俳歌火鳳謠金缸銜壁影相交引光奴逞挈雲手
遍摘春星挂樹梢

盧仝吩咐小心風珍重封姨護燭龍一陣丁東鈴索響
水痕花影蕩千重

誰倚銀屏坐首筵三朝白髮老神仙

熊滌齋太史

道看羊侃

金花燭此景依稀六十年

太史云年十五時舉京兆宴宛平相公怡園見張燈相似

今重赴鹿鳴矣

客散華堂酒未收
重教金狄守更籌
簾波聽喚青衣捲
別有名花照影遊
紫明供奉漸婆娑
倦把青藜走絳河
笑我金蓮舊詞客
照花時少照書多

遊仙詩

當年足下看雲生
三疊琴心道已成
誤寫上清蝌蚪字
一篇真誥不分明
風引三山境寂寥
碧天吹斷水精簫
關心子晉顏如玉
身隔雲屏手亂招
迢迢白練耿秋河
織女垂來恨已多
八萬六千明月戶
不知何處認嫦娥

相招須把碧芙蓉
海上歸來雪萬重
同住玉真清冷地
不司符籙便從容
東海塵揚阿母家
年來勾漏少丹砂
有人手執青鸞尾
獨立蓬山掃落花

海棠詞

春花開到海棠枝
天意來催艷體詩
誰把嶸山萬重雪
盡貽兒女作胭脂
東風儘力送紅潮
人自消魂雪自飄
不信天孫織雲錦
年年都挂此花梢
聽得流鶯向曉催
捲簾紫玉已成堆
生愁夜半成烟去
自取銀燈照幾回

當年妃子鬪風華浴罷華清髻小斜國色半酣紅玉軟
至今留影漾窗紗

我亦曾披宮錦行昏昏春睡不分明輸他花上金衣鳥
裹着紅雲過一生

九錫無人奏綠章自慚虛作紫薇郎夢中彩筆珍珠字
擬托朝雲寄數行

春日雜詩

千枝紅雨萬重烟畫出詩人得意大山上春雲如我懶
日高猶宿翠微巔

漠漠輕陰雨後看支筇長自倚闌干正嫌花氣無人送
一陣東風過玉蘭

水竹三分屋二分滿牆薜荔古苔紋全家雞犬分明在
世上遙看但綠雲

清明連日雨瀟瀟看送春痕上鵲巢明月有情還約我
夜來相見杏花梢

萋萋芳草遍春潭深院無人綠更酣何處一聲清磬響
斷峯西去有茅菴

玻璃作鏡當雲鋪返照春山入畫圖自憶頭銜揣風骨
此生只合住冰壺

鑿得雙湖似故鄉一枝柔檣泛春航落花水上凌波立
還擬人看舊日粧

風亭月榭事匆匆園漸繁華我漸窮半世經綸十年俸

思量都在水雲中

袖拂孤雲理素琴那知門外落花深山人不飲河東酒
只要君王賜茯苓

銀箏低按古涼州聽水聽風夜正幽忽報樹梢燈似海
小紅歌罷盡回頭

柴門掃雲雲不開雲中置酒臨高臺夕陽辭我下山去
明日問渠來不來

自把新詩寫性情勝他絲竹譜春聲流鶯啼罷先生唱
各有閒愁訴不清

題曹麟書學士天下名山圖卽送其乞假歸里

八十七歲學士何處來方瞳綠鬢顏如孩意欲吞盡齊

烟九點上天去故把名山幅幅都安排左手抱崑崙右

手拍洪崖使我一見心驚猜疑是夸娥之神負山至又

疑徐福之船從海回那知朱家爲兒劇孟弟當年雞壇

同歌長安街長安李夫子

玉洲先生

宏獎諸仙才夷門大會

敦盤盛誰執牛耳升高臺君年最長我最少浮萍一聚

風吹開人生轉眼如夢耳二十五年海水飛塵埃諸賢

晨星半錯落李公白骨縈蒿萊我亦清霜上頰久隱矣

君方長劍拄頤事玉階平生舞刀奪槩英雄志氣小差

未惟有宋玉登山臨水之心猶未灰潑烟墨寫雲雷五

丁捧筆萬靈磨崖不必穆滿長驅八神駿不必向平踏

破雙麻鞋只須一頁展開處但見清都紫府眼前崩嶽

而崔巍青宮尚待桓榮駕曼倩難戀瑤池杯太公磻溪
方坐釣兩耳頗聞文王催前別既已遠後會何時偕但
問黃石公他年滄海騎鯨去可要圮橋進履之孺子擔
簞相追陪

題碎琴上人集

一代編詩史寬收幾個僧斯人宗獨漉

上人自稱獨漉先生之後

派自南能賣卜簾垂市抄書佛借燈勸將狸德隱差免
十方憎

制府西園小修工畢遊後賦呈宮保

山事畢棲霞山公坐晚衙自安三品石小綴一庭花邱
壑憑心造烟巒愛客夸數拳猶未足探到野人家

不繫舟如舊亭臺事恰更添廊通兩路分竹散秋聲石
罅蒼松補窗虛碧瓦明公餘射鵬處楊葉與雲平
自寫爲山好新詩賦六章三江看雲物四度感滄桑水
靜游魚樂簾青夏日長鳴鳩隔花報春雨足新秧
我與西園柳蒙公種廿年自慚頭似雪不及樹參天相
隔才三里賡歌每數篇春風沂水意舍點向誰傳

宮保和詩

斜照映紅霞濃陰放柳衙山疑環几翠風颺隔簾花
大廈慚無補芳園詎足誇梁間雙燕子不認是誰家
亭臺猶似昨轉眼景全更石磴含雲氣蕉窗帶雨聲
松青鱗半老波漲鏡初明頗有才人意文無一筆平

老去詩情減相思有和章幽懷耽水石農事念蠶桑
竹影迴廊靜鶯啼午夢長栽花還意懶幾度問新秧
羨君生計好高卧自年年宦海渾無岸桃源別有天
琴書消永日雲物入新篇笑我舟難繫空留客舍傳
杭太史堇浦寄示嶺南集奉酬三十六韻

嶺海新詩至空山老鳳鳴焚香盥雙手展卷到三更
蜃氣青紅色鈞天雅頌聲傳經百粵地灑翰五羊城南斗
文星避西河講席傾塗金尋漢塔呵手試端坑樹寫黎
臙義糕題鬼子名離宮開絳帳化雨沃仙莖曉夢梅花
落高談孔雀驚三千詩弟子六一古先生陸賈歸裝富
庚桑尸祝成豈徒娛暮景真足慰交情憶昔公車召相

將殿上行采薇先輩引師律丈人貞德講資匡鼎噓枯
到禰衡充宗冠嶽嶽郭憲氣觥觥夜訪蓬池月朝騎太
乙鯨隨肩冰署冷分手玉堂清慷慨論封事寬容賴

聖明白衣辭領職短鍤許歸耕烏象僕先誤龍鱗爾更
櫻三山成小謫一樣誤前程倭乞蕭夫子人師馬長卿
弓衣詩繡滿蹋臂女兒迎近海文瀾濶還家五兩輕珠
娘曾買否梟博幾輸贏五十喪無毀三虞事未營菰廬

還薦士

時薦胡生
來白下

猿鶴豈忘盟感舊山陽笛藏書晏子

楹有人遊白下幾載滯歸旌鄉井離黃籍江東作步兵
書來風動竹別久柳啼鶯以我紅顏改知君鬢雪盈無
車難越弔望遠但沾纓想和軒轅律遙吹子晉笙蒼茫

千里月執訊代班荆

遣興

富春嚴子陵谷口鄭子真亦自懶惰耳心非有所嗔男
兒不作官豈遂無立身必求所以然定知非解人
人難作我兒我難作人父所以生不育皇天不輕與古
來真才人俎豆非兒女諸公莫相關我自有一千古
貨殖子貢富瓊牖原憲貧富乃勞其力貧則苦其身治
生貴有道行樂貴及辰自活苟無才何以活生民
荒山本無墻梅雨復來敗山居已十年盜賊尚無害灞
上李將軍未必餘威在楚國舊令尹或者有一遺愛
當時只望老以便好辭官此時只畏老以便常尋歡望

之恰已至畏之不能逃始知望與畏兩念俱徒勞

古人吾不服今人吾可知惟其去人遠執禮彌謙卑奕
棋貪有伴降心以相從應付吾手上高低吾心中

當年修隨園過溪事營造今年修隨園溪內日探討遠
修跋涉遙腹裏翻未了近修結構易亦復偃息好始悟
古諸侯封國不嫌小

話桑麻圖爲方綺庭明府題

東漢張君游驅騶漁陽道前村有桑麻顧之欣然笑先
生縮綬時與彼作同調風和柘樹陰雨晴麥隴初捐除
長官體輕乘舁棧車召彼野老詢桑麻今何如

桑者前致詞今春葉青青麻者前致詞漚營得奇羸使

君未來時土化多未宜使君既來後犬足多生鼈使君
不嫌醜敢獻村中酒山妻急繫裙牧童忙鼓缶長跪問
使君見過唐堯否

使君忽心動我亦有桑麻汝既安汝業吾亦憶吾家高
掛烏紗冠歸看白門花白門有一人種桑十年矣半樓
青溪雲滿徑桃花水若再欲話時請君來洗耳

偶題

春歸未歸雨復晴竹西牕戶風泠泠野薔薇喜没人到
雪白小花開一庭

香亭白徐州還白下將歸鄉試作詩送之

一別鬚如此全家怪汝蒼滄桑生面目世事感星霜到

眼園亭換關心兒女長阿兄難免俗先要問歸囊

聖主崇詩教秋闈六韻加今年得科第比我更風華五

字清商脆三條畫燭斜相期呼小宋追步八磚花

去年書慰我作叔苦無因香亭和余失子詩云薄福難為叔添丁轉惱爺門戶

堪誰托芸香少後塵桂花兼子采荆樹及時春莫再生

才女能詩便嫁人戲四妹

聞說新居勝柴門汝未開到時花繫馬飲處月當杯遊
子隣翁認高歌啼鳥猜多增棠棣館頭白我歸來

悼柳

水上古柳彎環如老龍余誅茅築岸理而出之

置亭焉顏曰柳谷不逾年柳死

小倉山房 卷十五 十一
受賞非君願相知愧我麤建亭流水上從此好春無古
幹寧辭伐殘枝強欲扶蘭成枯樹賦吟罷覺心孤

傷鶴

二鶴翱翔籬外獵者過以爲可羹也火鎗一發
而斃

奇禍發清流乘軒兩鶴休火攻真下策羽化入高秋小
瘞苔痕薄平沙爪跡留神仙還有劫何處免閒愁

諸知己詩

有序

曹公以太牢祭喬太尉卽宣尼報德之說阿瞞
猜忍猶知此義况君子乎枚少也賤長登仕途
好我者中心藏之今生四十四年矣伏而不出

髮有二色所報可知每學張步自呼負負計不
與形骸俱化者惟有文字做少陵八哀聊志寸
心其他或頌其生或輓其死見集中者不復再
見金公恩最深故重言之生存者深陽一相面
已統題之曰諸知己詩

禮部侍郎浙江提學王公蘭生

予幼學典謁觀光逐人走試籀書九千飲水墨一斗奕
奕王交河許作童子郎膠庠騎竹馬觀者嘆道旁蟠桃
花未開春風吹已早秋來寧不實自愧登盤小

兵科給事中浙江提學帥公念祖

杭州蘇司業羣士附如毛非其所薦者竊竊愁琴焦師

公無先容拔我升前茅按劍對夜光掘獄出毫曹長安
一爲別咸陽萬里遙青蠅宦海飛白骨沙場拋可憐養
鸞鷲不見賦鷓鴣何當抱孤琴塞外將魂招公爲陝西
布政使竄
死塞上

處士柴東昇

瀨水一盃飯翳絜一頓餐當時寸心足此事千古難我
昔粵西行助者柴先生先生非有餘蓮幕分杯羹君家
耕南弟與我臭如蘭以愛及所愛同舟赴高安富春江
水清洪都江月白照我與君遊照君與我別如何照施
恩不能照報德

廣西巡撫金公鉞

中丞巡粵西大阮遊幕中馳書招我往一見呼終童作
奏薦之天署年驚王公詞科三百人爭來趨下風我遊
蓬萊池公歸兜率宮愛我眉宇異期我爵位同語我韜
畧計許我旂常功一事不能副兩淚何由終九原如可
作持面愁相逢

協辦大學士吏部尚書孫公嘉淦

孤鳳蹲青桐不鳴如有聲金鐘懸東序萬物肅儀型孫
公司爽鳩海內儒林亞天瑞五色雲丹青佐神化我來
溫卷時春風吹滿面已助阮修婚更作正平薦登門已
足榮何況噓植之千秋溯淵源大賢爲吾師

大常寺卿唐公綏祖

唐公智勇深高秋懸冰鏡一顧市可空九折臂逾勁賤
子趨末階短衣不掩脛公命下達來平章將女贈我曾
訂范雲何敢學子敬緣薄已慚恩福薄更慚命讀祭喬
公文琅琅不忍聽

文淵閣大學士史公貽直

唐時顯慶輅皇宋夸物在一鳳鳴虞廷雍容六十載周
官三百六歷歷皆所司唐區十五道各各駐旌旗開口
姚元之放手杜黃裳瑕瑜不相掩才力堪低昂公以姚
杜兩公
命奉詔教翰林我擬策一通謂有陸贄直而兼長沙
忠萬金何足感一言長在心仰止一品集封敖涕淚深

編修李公重華

仙人碧虛骨不染明窗塵偶歌梅花詩冰絲彈孤雲市
上逢郎君雞壇敦夙好門下作門生裴皦啜其笑長安
鳴珂里姑蘇青雀舟夫人行大享內子折花壽思之如
前生華屋悲山邱

御史王公峻

孤峯生大海四顧全無地志士立中朝寸心惟有帝
先生獬豸冠目作愁胡視屢請上方劍王孫何自厲愛
我賦秋蘭逢人夸姓氏卿輩縱不聽奮舌行吾意說士
甘於肉排闥時掉臂歸老擁臯比得免魑魅忌千秋寂
寞名表章誰我繼

兩江總督德公濟齋

講學俗儒耳惟公便覺雅爲問所以然一真黜百假宗
藩靜而尊服侍皆宦者赤子心盤旋黃金手揮灑置身
三古前遊目兩廡下排衆用一賢命我擁雙社幸遇朽
木雕擬躍祥金冶鳴呼伯樂去樵悴終天馬

兩江總督策公楞

策公不知書能收英雄才龍泉迎風胡一見心顏開彼
此留不得兩心各自哀賤子還鄉井將軍去輪臺陳湯
誤質子班勇無軍功蛇矛兩手折鐵鎖九天封未獲訊
廷尉先聞劫義公肉飛瀚海草血涼天山風吾欲負馬
革裹骨祭鬼雄

福建布政使陶公士鑽

離官樂行行驄馬止相逢陶士行苦留王稚子問
公識我歟公云不識君上指丹鳳闕下指黔首民

李名世秀才

我聽溧邑訟有客戴儒冠日日立堂下如石點頭看疑
是攘獄者來探鞫刺端覺不干我事姑且聽其然亡何
我改邑驅車出郊外此人伏艸中奔向車前拜云是高
淳人偶來溧邑界愛我聽訟明賃屋居此間日聽一二
事歸與父老傳我方拱手謝彼復攜袖言餉朱提八流
願當劉寵錢拒之彼淚下受之我茫然從此一爲別騰
身如雲烟感君好善心愧我酬恩意冥冥三十年惻惻
至今記記得門狀書秀才李名世

詩畢後再題一絕

事難如志都歸命詩豈酬恩畧表心回首河山人宛在
相思便作幾回吟

避暑

避暑無他法安身有秘方只離紅日遠自覺碧天涼

起早

起早殘燈在門關落日遲雨來蟬小歇風到柳先知借
病常辭客知非又改詩蜻蜓無賴甚飛滿藕花枝

改詩

改詩難於作辛苦無定程萬謀著不下九轉丹難成遊
覺後歷妙陣悔前茅輕抽絲緒益引汲井泉彌清桂巖

絕色顯葉割孤花明如探海嶽勝人到仙不行如奏鈞
天律鳥啞鳳始鳴脫去舊門戶仍存古典型役使萬書
籍不汨方寸靈恥據一隅霸好與全軍爭吹角不笑徵
塗紅兼殺青相物付所宜千燈光晶熒寧亢不願墜寧
險毋甘平動必拔龍角靜可察蠅蠅選調如選將非勝
不用兵下字如下石石破天方驚豈敢追前輩亦非畏
後生常念古英雄慷慨爭功名我噤不得用借此鳴
豈盡才而後止華夏有正聲凡彼小伎藝傳者皆其精
奚可聖人教飽食忘經營止怒莫如詩管子歌之可怡
情多文以爲富擁之勝百城旣省絲竹費兼招風月聽
上鳴 國家盛下使羣賢賡縱死見玉皇猶能獻韶英

風帆

一葉高懸浪拍天孤迎紅日孰爭先
風非不順吹難飽海縱無邊住有權力大
勝騎龍馬走身閒長抱水雲眠
篙工未肯將君用要等餘皇萬斛船

馬鞭

烟樓撞處久摩空曾記馳驅閬苑東
斜指斷腸雲外樹自鳴得意馬蹄風
隔花傳響春山遠帶雨催程落照紅
一个祖生追不上歸來忍待管絃終

大樹

繁枝高拂九霄霜蔭屋常生夏日涼
葉落每橫千畝雪花開曾作六朝香
不逢大匠材難用肯住深山壽更長
倚樹有人問名字爲言南國老甘棠

古琴

箏琶海內傳新曲禮樂千年剩老身
挂壁尚存清廟夢過時誰奏廣陵春
敢隨武庫爭高價只覺羲皇是故人
我不知音偏好古七條絃上拂灰塵

琴操曰伏羲造琴

夸父杖

八荒霍霍驚仰首空中衣袂逐日走
拔山倒海事事終不追白日非英雄
果然手提黃金烏問公此樂胡爲乎
如何口渴顏色槁一枝杖作鄧林草

延陵馬

延陵卓子馭馬猛前有霜刃後有挺
馬行不進斬以狗

馬骨之高與山等伯樂見之泣不止造父之御不如此
天生神駿美且都入公之廐有若無

刑天舞

鸞鳥能歌鳳鳥舞刑天效顰舞更苦左于右戚舞不休
天帝欲笑千靈愁爾力非不大爾心非不賢臣有一言
陳蒼天先賜頭目後賜手俾知好醜能折旋

狄鞮倡

妖嬈狄鞮倡不嫁年少郎不知女誠字幾行但願高車
大馬來煌煌吹笙酌斗烹肥羊豈不懷故夫故夫羅袖
多明珠豈不彈青琴青琴悒悒非妾心豪客愛妾媚君
王愛妾嬌終身不出黃金屋老大還吹白玉簫嗚呼君

不見天邊孤月長門斜絕色湘娥啼暮花

得履詩

山齋失玉履半年爲金明府奚奴攫去鬻蘇州
不售再鬻揚州金公廉得顛末遣復故所

飛鳧久化采雲輕故劍重聯舊雨情見面儼如遊子返
還家轉使主人驚身行吳市春帆遠夢覺揚州秋水明
想爲林泉緣未斷隨風又到石頭城

屢亡冤雪徒人費璧返功歸藺大夫神物終憑犀照得
奴星不累月明孤果然世有重圓鏡勝使人求罔象珠
安得富官盡公等早提塵海入冰壺

刈稻江北作

無端幽人出有似白雲去一笑下空山書燈照江樹江
上青青峯黃昏若驚顧不道細雨中尚有孤舟渡
雨行聖人爲蘆中窮士寄行行駐風帆萋萋傍古寺波
靜風葉停澗寒水花細日暮問芙蓉有人采卿未
老農烟中來牽犢迎田主豐歉各自呈紛紜具雞黍床
前紅葉霜衣上稻花雨四隣無雜聲農談相爾汝
雨多禾生耳田蕪豆落其且喜土化宜彼黍終離離飲
罷瓦盆酒握別牧童手明年吾再來門前綠雙柳
回船逢中秋天水澄孤清私心念明月果然東峯生蘭
檝駐瓜步錦衾隔石城清宵不成寐浩歌酬吾情

送竹軒族弟之河南兼簡滑令呂君

吾宗遠行邁霜色淒河梁因依十餘年攜手此華堂詩
書同檢校家事相扶將一朝辭我去逢矢射四方貧家
養十客九客猶羣翔胡爲我從昆頃刻成參商階下芙
蓉花娟娟泣道旁春榮嫌葉密秋老愁枝傷今我復何
時兩鬢初凋霜豈不願君留彼此看空囊豈不勸君醉
驪歌難盡觴惟有贈一言富貴早還鄉

讀書矜半解往往言多尤遇人無單複如水行膠舟汝
今初涉世韋絃須矯揉行行重自愛母作高堂羞我有
舊官聲煩君作遠郵寄與呂大夫滑國爲賢侯我有閒
邱園無力起亭樓望汝攜歸資來此築菟裘兩願都能
償老夫復何求但托紅鯉魚寄書碧山秋

捲簾

偶捲北牕簾風吹春色冷一僧一朶雲同上青山頂

哭三妹五十韻

五枝荆樹好忽隕第三枝最是風華質還兼窈窕姿令
儀宜協吉論齒未應衰情以隨肩重喪因在室悲鵲鴿
飛竟斷手足夢重追弄藥爭花日將筭未弁時金籠擒
蟋蟀竹馬逐隣兒各踞長松輟同分野竈炊書燈裁紙
照學舍隔簾窺呵手團清雪當盤筭劫棋鬪殘春草綠
舞罷柘枝歛貧不爭梨栗懼能啄豆其非魚常作隊似
雁不差池擬續蘭臺史堪刊紫石碑阿兄試京兆小妹
倚門相望信頻穿眼登科代展眉分襟長戚戚聚首更

怡怡至性醇無比多情累在斯一聞婚早定萬死誓相
隨采鳳從鴉逐紅蘭受雪欺踏掃囚素髮脈摘損凝脂
瑱珮嬰兒撤犁鋤健婦持螯餘添姊禍嫁後失爺慈捨
宅棲蘭若長齋伴濟尼當官懲媾惡合族笑姨癡婦棄
仍歸矣天高不鑿之已經分破鏡長自奉慈帷紛悅辛
勤侍羹湯宛轉吹呼虛老親伴問字舉家師有女空生
口無言但點頤妹一方形勤指矩圓象強摹規水色雲
沉閣山光樹嘯鵬避人常獨坐對影輒連瀉豈戀終風
暴常懷其雨思冰心明月見春恨落花知寂寂芳華度
奄奄玉貌移九迴腸早斷一日病難治自覺傷心極臨
危作遠離家貧投賤藥膽壯誤庸醫白下巫陽至揚州

蕩子羈魂孤通夢速江濶送終遲得信前一夕夢路上與妹如平生歡錢猶卜靈前帳已披承衾摩瞑目搜篋理殘詩欲止高堂慟先教私淚垂蒼茫惟有恨啼勸兩難爲苦憶連年瘡頻勞徹夜支今朝偏送汝他日更呼誰殘雪敲窗戶悲風動酒卮浮生千古幻哀輓幾行辭盼斷黃泉路重逢可有期

陶淵明有飲酒二十首余天性不飲故反之作不飲酒二十首

淵明與劉伶開口不離酒終竟兩人賢果然爲酒否我自赴華胥不煩杜康引酒味吾不知酒意吾能領

醉鄉去中國不知幾萬里偶一問其津身熱頭痛耳所以桃源人雖隣莫通使惟有書味甘行行堪沒齒禹王大聖人先我惡甘旨千鍾與百榼倦勤從此始客至如春風來者皆入室率性任所言寒暄各一一可以具雞黍可以聽瑤瑟欲宿卽張燈解吟亦進筆若問有酒否此事未可必

天地無終極風輪盪不禁不知古人古安知今人今吾園二三月全家釣水濱彼得此亦喜此失彼亦嗔適野獲天趣忘機蘊性真自笑一家人都遊羲皇世儀狄尚未生何由知酒味

有目必好色有口必好味戒之使不然口目成虛器縱之使無涯我又爲渠累聖人善訓停君子素其位

古皇無史官宣尼不著書古之大聖賢淡淡忘名譽君
看臯夔外傳者爲誰歟文王有多士名姓亦無聞女媧
戲團土本自難區分我不知有我而又奚云云

讀書息微倦危坐操青琴求靜常反動絃中怪此心明
知非古曲聊復審其音海水飛何處鍾期亡至今借問
聽者誰門外幽蘭深

名教有樂地一誤殊難曉英雄與文人往往託佛老匪
自矜清超卽是貪壽考譬如飲酒人非此難自了吾學
無不窺惟憎二氏書看則縮其額如嗜菖蒲菹大道有
周孔奇兵出莊周橫絕萬萬古此外皆蚍蜉君請擇於
斯何事更他求

陶令責子詩愚多賢者少未免心戚戚借酒解懷抱我
今雙無之陶間亦云好無所藉杯酌匪我求童蒙得姓
三千年未必以我終君看鄧伯道亦得歸邱中

班家有姪好稚齒入椒房自恃君王愛恩如海水長一
朝咏紈扇朱顏逐漸凋君王縱復召終讓新人嬌寂寂
長信宮涔涔泣不止初泣爲紅顏再泣爲青史華髮吹
秋風此生長已矣

古來功名人三皇與五帝所以名赫赫比我先出世我
已讓一先何勞復多事平生行自然無心學仁義婚嫁
不視歷營墓不擇地人皆爲我危而我偏福利想作混
沌人陰陽亦相避灌花時雨來彈琴山月至天地亦偶

然往往如吾意

風霽月色明露影蒼苔上幽人清興發杖策成孤往不
知所尋誰寓目卽心賞隣人知未眠水面篙聲響

細雨過深竹水影澄空雲不知何處花微香如有聞漸
漸春風和時時芳草熏自書一片葉告知雲中君

我愛王思遠衫服何燦爛遇所勿經懷短衣不掩胷又
愛桂陽王興到詩酒濃偶意有所廢戚友不相通君去
我欲眠君眠我亦去不藉醉爲辭天懷有深趣

躬耕吾不能觀耕園最便水響叱牛聲土色老農而老
農前致詞秋災求減租我乃備其力以有易所無農夫
喜聳肩欣欣來負輿我亦恣所往看花招其徒春風熏

玉顏秋月澄冰壺旁人誤生疑先生醉矣乎

春陰漏日遲嬌鳥啼花早羣鳥音難分但覺春懷好旣
醒復重眠紗窗碧烟曉啼鳥莫相催春夢儂猶少

任事在人後見事在人先以之涉斯世庶幾無尤焉吾
年方垂髫早已登賢書三十挂其冠四十白其鬚味早
易撤席遊早易回車一早無不早未知死何如

兒童籠翠鳥朝夕鳴前軒飛者念其朋籠外語殷勤一
朝膠絲發以情累其身傷彼鷓鴣智何如精衛仁吾其
愧鳥夫斯人吾同羣

形神天所付名字吾自取形名兩無時此身置何所朝
見一莖絲暮吟一首詩借形傳我名名傳形不知

嘗讀高士傳過潔亦無聊太谿刻自處生世如鴻毛我
雖不飲酒恰能舖其糟雲閣自層層風裳必楚楚燈圍
花萬重屋聚書千古寄語於陵子君輩徒自苦

夜過瓜州

霜雁一聲語烟江兩岸秋蘆花三十里吹雪滿船頭我
欲乘潮去孤帆夜不收蒼茫雲樹外明月出瓜州

明月

明月乍離海長風吹上天爭光衆星盡受影一峯先水
色金波麗秋心玉鏡圓雙雙木蘭槳搖落桂花烟

哀兩生

并序

甲子分校南闈薦兩卷不售一松江陳邁晴一

太倉吳維鶚陳故宿學榜後作百韻來謁斐然

成章未幾病死吳爲梅村先生曾孫少年玉貌

登癸酉賢書亡何亦死

蓬蓬江南春青青芳蘭枝舉世旣莫採秋風復敗之蘭
敗復何言寸心傷美人如明月曾照幽蘭春吳生
華腴族弱冠人如玉陳生雲間彥烟霄躡鸞鷲薦君不
識君孤琴彈白雲相感來相訪賞音良不爽忽弱一介
焉天道其如何再聞雙璧埋吾淚空滂沱吹花不上天
一墜且黃泉世上峩峩冠寧如兩生賢

又病

山中蒲柳畏西風白髮催添又幾重病每防秋先自怯

天如成例不姑容詩書暫遠妻孥近膳飲才清藥氣濃
消受名花都有分年年只是負芙蓉

送望山公入觀

九月尚書觀 紫宸九重剛下有 温綸臯夔豈為科
名重鄂爾泰尹繼善二人 馬鄧新兼 帝室親抗手

侯王俱後輩趨庭公子半詩人弓刀小隊秋郊外笑指
芙蓉殿晚春

少宰裘叔度典試江南事畢登程入山視疾

柴門駐馬日 小睡八座籠街病客聞天上使星尋舊雨

山中孤月照 卿雲同年人少情難捨候送官多手又分

方握手而飛 報 將軍制府中 取 倚榻相迎扶榻別燈窗葉落尚思君

贈副主試錢相人先生

種成桃李滿江陰遠訪成連海上 一見到小君交可想

記同泮水感尤深青雲不改書生 白簡難忘解豸心

公會劾兩江 制軍黃太保 一十五年才一會那堪此後再如今

假山成

三成號昆侖此義本爾雅幽人戲為之輦石禱青藉初

將地形叅繼用粉本寫高低肯隨人其妙轉在假平生

欽崎心一旦吐諸野微微洞穴明漸漸雲烟惹五嶽走

家中一拳始腕下未晚早扃門慮有飛去者

寄懷望山公

玄衣人去雪飛時一月空山少和詩豈獨忠勲高海內

卽論儒雅亦吾師東南事重回輪早臣主情深下殿遲
寄語梅花緩調鼎孤雲野鶴正相思

不寐

一聲兩聲雞初鳴四更五更天未明羣雞亂啼聲漸迫
紙窗才露東方白病人夢短冬夜長燈花墮几鼠鬪梁
頭自伏枕目自張四十年事如何忘

商丁孫尊歌爲素將軍作

素公雙瞳今罕有辨古器物如犀剖雞匱魚觚羅成行
就中商尊尤冠首規身環滄東半腰侈口吞舟容一斗
紅搖赤水珊瑚明翠凝碧玉琉璃厚蛟龍揚爐鳧氏鑄
丁曰孫三字垂非陰花陽篆劃深雪雷紋雲氣蟠蚪蚪

黃目睽睽當臍瞪飛廉嚙嚙繞腹走想當元女降生商
兄癸婦庚鑄彝卣大局七個橫廟門典寶一篇陳黼右
媵臣負俎說調羹成湯嫁妹狄作酒或盛菹鬱彤祭日
或斟雉羹彭簋叟史官言勢來峩峩稱祝尊前再拜手
道是器成永寶用子孫無疆王萬壽三腹有玉盤有銘
同與此尊垂遠久一朝漢畫封河陽白馬人行器不守
麥秀空傳箕子歌銅盤早蝕比干紐三千年過太陰中
不知有周秦更否神物數滿當出世咸陽耕夫傳某某
苔皴土繡形離奇達官茂視等瓦缶素公一見購百緡
如辨墳羊識土狗召良工某制作瓶月洗黑雲光照牖
沃丁武丁靈爽存猶銜花枝香滿口甄邯威斗子尾犧

小倉山房
若數班行都列後我乃撫尊長嘆息世事輸君常八九
函牛之鼎當康瓠折鉤之喙享敝帚人才那得如金銅
長在泥沙不速朽願公愛上如愛尊母使埋淹嗟不偶

輓孫文定公 戊午鄉試座主

黃扉躬佐泰階平星隕中口樞馬驚青史三朝書行狀
蒼生四海望銘旌殊恩禮口加羊祜溢美人幾累孔明
身後關心房太尉有無遺 公諫東征 偽稿一案 公爲名累

隨園二十四咏

倉山雲舍

小人有老母倉山多白雲 平母居山中板輿常欣欣看
花與山共采藥與山分

書倉

聚書如聚穀倉儲苦不足爲藏萬古人多造三間屋書
問藏書者幾時君盡讀

金石藏

不見古人面須見古人手廣搜金石文歐趙所未有何
物爲之鄰瓊琬尊罍齒

小眠齋

秋齋號小眠空廊無響屨讀倦偶枕書書痕印滿頰不
知牕外花飛過幾蝴蝶

綠曉閣

朝陽耀高閣萬綠一齊曉虛窗聚景多宿雲出簷早翠

微西山低白塔東城小

柳谷

宅西顏柳谷義取尚書詞未必康成識差免虞翻譏春
痕搖水痕滿池如漚絲

羣玉山頭

梅花襍玉蘭排列西南峯素女三千人亂笑含春風我
記相別時瑤臺雪萬重

竹請客

廬仝所思客乃命竹竿請何繇知非僕長教此君等美
人來不來立斷風鬟影

因樹爲屋

銀杏四十圍葉落瓦無縫主持小倉山惟吾與汝共
借屋上蔭招宿丹山鳳

雙湖

我取西子湖移在金陵看時將雙鏡白寫出羣花寒前
湖饒荷葉後湖多釣竿

栢亭

種栢成一林屈折爲庭宇奚須文杏梁已遮碧瓦雨翠
禽居之安日坐亭中語

奇礪石

到公有奇石曾向華林補千年幽人得風月一齊古當
作石交看摩挲日三五

回波聞

不放流水流清池嫌太滿常放流水流新荷尚嫌短建
聞唱回波勸水行緩緩

澄碧泉

山頭峯百層山下泉一尺葉落水面青月落水光白此
水淡無言泠泠終日碧

小樓霞

萬事不嫌小但問能成家我有一間屋公然類棲霞絕
壁屋前山天香屋後花

南臺

築臺望雲物雕欄盡南向天空星可摘木落山獻狀露

葉如水明前峯新月上

水精域

玻璃代窗紙門戶生虛空招月獨辭露見雪不受風平
生置心處在水精域中

渡鶴橋

白鶴欲過湖照水不得路十月與梁成羽客含蘆渡新
霜鋪玉勻何人試初步

泛杭

不負一池水招招學舟子君覺歌口香知在藕花裏畫
橈莫蕩公水動鴛鴦起

香界

佛家有香界旃檀焚諸天我家有香界幽蘭種溪邊能
聞而知之鼻在耳目先

盤之中

盤意取屈曲旋轉無定區我意亦倣此乃築蝸牛廬紆
行勿直行公等來徐徐

嶗山紅雪

王母宴瑤池蟠桃開似海酒罷落花飛散作諸天彩造
屋居其間紅顏長不改

蔚藍天

琉璃付染人割取青雲片終朝非采藍彷彿天光現客
來笑且驚都成盧杞面

涼室

避暑如避客一室陰悄悄高梧拒日多曲澗引風早
熱中人偶來也覺此間好

佛家有香界旃檀焚諸天我家有香界幽蘭種溪邊能
聞而知之鼻在耳目先

盤之中

盤意取屈曲旋轉無定區我意亦倣此乃築蝸牛廬行
行勿直行公等來徐徐

嶼山紅雪

式母宴瑤池蟠桃開似海酒罷落花飛散作諸天彩造

中人興來出覺此間哉

巖巖收巖客一室劍削削高淋珠日冬曲斷片風早燕

京室

人割取青雲片終朝非采藍彷彿天光現客

